

靜

居

集

二



四部叢刊三編

靜居集

(85721)

中華民國二十五年六月初版

每部二冊定價國幣壹元貳角

外埠酌加運費匯費

發行人

王雲五  
上海河南路

印刷所

商務印書館  
上海河南路

發行所

商務印書館  
上海及各埠

靜居集卷之三

潯陽張羽來儀著

七言古體長短句

米元暉雲山圖

前代幾人畫山水逸品只數南宮米海岳樓前北固山  
頃刻雲烟生滿紙古云丘壑起心曾恍惚侶與神靈通  
素壁高懸卧清書耳邊恍若聞松風怪底青山起毫末  
森沉綠樹臨溪活仙人道士疑可招芝草琅玕俯堪掇  
千里能移方寸間天機揮洒過荆關如今畫史空無數  
對此高踪詎敢攀

高彥敬雲山圖

房山尚書師小米畫得雲山稱獨步筆精墨妙心更苦

世間畫史空無數羨君平生愛竒古興未寫此滄洲趣  
須臾丘壑吐心曾高閣連江動烟霧峭壁喬松靜杳冥  
森然侶與神靈遇咫尺圖中萬里景慘淡悲風起毫素  
高堂坐對心神融我欲誅茅向何處

送周以道入太學

吳興才子生白晷弟子負中名第一窮經解說毛公詩  
擣文早夢江淹筆入學九年今大成鄉書妙選赴神京  
廣文惜別將詩送造士聞未罷講迎杏花壇前拜師傳  
芹藻池邊試章句橋門學者如堵牆看君落筆揮三賦  
從此飛騰異衆人豈對囊螢長苦辛聖朝用才不論次  
年少逢時當致身離城祖帳紛成列綠柳絲上正堪折

毗陵道上逢梅雨丹陽城裡經蒲節臨期與子一躊躇  
莫忘草澤共閑居古來貧交不可棄行到金陵好寄書

梁節婦

赤城曉擁青絲騎玉鏡愁爲落紅淚冰魂偷逐水仙歸  
綺樓一夜靈犀碎六曲闌空不碍春羅帶盤風輕颺塵  
池波不動夜光碧青天影落樾蒼雲相思月照樓前水  
離<sub>上</sub>芳樹流紅子無情桃李亂中開不學芙蓉抱霜死

送人之官河南

羨君罷秩好遊豫舊遊不憶洛京路鴈飛不到吳天遥  
千里中原君獨去別離家惡莫秋時縱使事歡情亦悲  
西風吹寒射馬耳處<sub>上</sub>虫鳴乘葉飛行李匆<sub>上</sub>沙長道

風波險阻難自保月昏山店起宜遲  
古道入稀歇常早  
單車御風周晉間山川奇勝恣追攀  
千金厚利亦何有  
世間萬事如等閑愧我浮沉局閭井  
遙望高山一何永  
別來莫遣寄書稀為看南來鴻雁影

奉贈李仲賓侍郎

太白醉吟詩百篇龍眠能畫兼能禪  
二老清風今儼然  
息齋家法得正傳曾中造化妙  
斡旋眼高四海空雲烟  
若非天上人定是地上仙  
數莖白髮籠烏紗學佛未肯  
披袈裟長槍大劍不留意  
脊梁鍊豎雙結跏蒲團漏泄  
真消息毛錐迸出優曇花  
有時或賦詩風號雨鳴神鬼  
悲麗如天孫織成雲錦衣  
奇似波神捧出珊瑚枝  
有時

或寫竹密上疎上翠新沃三竿兩竿風外斜千葉萬葉  
烟中綠清處夷齊心透水瘦時郊島肩削玉不然翰墨  
淋漓洒黑雨紙上龍蛇欲飛舞法度忽似平祿帖規模  
又入蘭亭序或說有或談室龐老維摩立下風龜毛拂  
掃乾滄海水瓦角杖擊碎須彌峰君之三昧何從得太  
白龍眠疑未識我未叩君上不言一咲相看遠山碧

賦山中樂送友還山

山中自得山中趣卜居近山向山住采山買斧暫離山  
憶着青山還復去陰上夏木綠成帷百尺垂蘿可製衣  
清歌自有流鶯轉妙舞時看獻鳥飛結友漁樵與麋鹿  
豐草長林自相逐穿雲摘果常滿筐入澗採芝易盈掬



朝即對山飲暮即對山吟山古如我貌山清如我心以  
此只知山中樂不願市朝與城郭我愛青山亦不薄送  
君聊賦還山作願輸十萬買鄰錢相逐幼輿住巖壑

贈四明袁生廷玉

儒而善相

和氏善相玉楚人乃失之後王不深諒空沉沙與泥方  
歎善相馬秦穆猶見疑向無孫陽識終與駑駘齊人生  
窮達在用舍呂公許負將何為君不見淮陰餓隸封侯  
面沛公不遇仍負賤又不見新豐孤客人莫顧可憐未  
入常何薦英雄不用則為鼠燕頤虎頭何足羨袁生炯  
炯雙瞳方走馬能識人中王如何不帶食肉相一生奔  
走鬚眉蒼由耒目睫不自見何不借取青銅先生云富

貴不足取我欲玩世聊徜徉昔年夏統在京洛不說姓名惟賣藥眼中不見賈侍中小海歌闌風雨作生乎生乎如其人飄然東歸東海濱倘過鑑湖逢賀監為報山人行乞身

題赤城霞圖送友歸台

結髮好名山遨遊遍吳楚東遊不到天台路長憶興公賦中語赤城煥高霞翩然空中舉靈巖溪碧草春淒淒瀑水和風響秋雨我欲振金策飄飄凌九垓遊神不死庭迴光睥瓊臺手招丹丘人共卧石上苔紅顏去人不復返老大求仙嗟已晚生今一去愁人心贈生赤城圖聽我赤城吟勞亭下一杯酒離愁萬里生秋陰客車明

日當早發雲飄孤飛度東越國清寺前千尺松歲晚應  
歸望山雪道逢寒山子為寄相思情未絕山人若欲知  
我心五界峰頭看明月

天目山房

昔卧香爐頂汎觀山海圖東遊擬拂華蓋雲下瞰弱水  
窺蓬壺天公有目何不在天世傳寄在茲山顛兩泓碧  
水涵霜鏡炯如雙瞳落天邊天高聽卑視亦宜然云有  
十二清虛之洞府珠宮貝闕不可睹靈風颯々卷飛雨  
危石深林人上苦盤渦轉較若雪山青天降々響天鼓  
龍藏其中是耶非但見人魚作人舞慎勿戲之逢彼怒  
頃刻滂沱淚下去前年南昌仙邀我望山雪神官玉女

待我耒欲徃從之路超越若人有仙骨居與洞府鄰雙  
童耕雲種瑤草石田自熟無冬春卧處烟霞飛枕席醉  
裏山花落酒巾松風蘿月朝復莫坐見麻姑白髮新我  
欲駕白鹿共子攀雲岑請天開天日照我一片冰雪之  
清心但恐此目不司視如星有箕斗不可簸與斟且復  
臨流漱金碧聽我長歌金石音不然倒却池中水釀作  
百斛之春酒共君甘辛醉卧雲林洪厓舉手或相接更結  
丹梯千萬尋

遊鄒縣嶧山

嶧山高數百尋山下只尺仙凡分紅白花開淺深樹  
高低石架玲瓏雲祖龍虎視峻六國臣斯篆文頌功德

佞詞諂語勒諸石野火一焚已無跡亞聖碑紀王祠呵  
 衛煩靈祇騶衍宅韋躋墓榛莽知何處紫烟翠霧鎖空  
 蒙恍疑誤入桃源路洞口仙翁坐芝石双臉凝丹髮垂  
 素見人長揖無一語松間指看三珠樹左金童右玉女  
 捧螺杯擘鱗脯霓裳曲奏胎禽舞玻瓈盤瀉薔薇露咲  
 游乘興不知醉一覺黃粮天地外啼鳥數聲幽夢醒業  
 風吹入紅塵境生來結得山緣熟每見好山如骨肉看  
 山看水二十年神仙窟龔今拭目不須更走匡廬間老  
 死嶧山心亦足何時五花峰頂突結小茆茨自斷白雲  
 種黃獨

或云題首有一夢字

望太湖

登高丘望遠澤蓬萊三山不可測何如具區億萬頃洞  
庭連娟向空碧東風吹盡吳天雲玉盤雙螺翠堪摘我  
昔東遊鳳皇臺嵯峨巨編如山來白波不動鏡光曉雲  
颿千幅爭先開中流縮首心茫然恍如乘雲行九天驚  
濤忽逐迴風旋砰雷轉轂奔雪山龍伯鬼國見眼前失  
勢一落獐蛟涎舟師拍浪呪浪婆我亦再拜不敢言平  
時之險且如此何況震蕩洪荒先帝堯咨嗟逾九年黃  
能無敷幽羽澗有子大聖與天通一朝出我群魚中試  
觀此湖險始知四載功長養草木華無心謝春風吳越  
之事良可鄙虎戰龍爭方未已水犀百萬今安在惟見  
夫樹白雲裏鷓夷身退帶蛾眉不直滄波一杯水我欲

臨流叫神禹湘靈鼓瑟馮夷舞盡挽湖波釀作葡萄春  
飲醉扁舟臥烟雨

沈氏宜春堂屏徐給事貴所畫春雲疊嶂

休文堂前花滿枝風物四時春更宜前年三月宴客時  
坐上才傑皆能詩眾中獨許姑蘇客千里江山貯骨髓  
醉來意氣為傾倒寫出層、好山色素屏十尺粉堊鮮  
千巖萬障含春烟客子疑行灞橋路人家似住武陵源  
山僧投寺亂松裏山下鳥啼人未起柴扉日出高薜蘿  
漁網波生撒江水楚水湘雲互蔽虧渚宮隔岸遙霏微  
東嶮晴嵐西嶮雨何處長歌樵子歸亭下流泉春浩浩  
上有居人往來道相過總是看山來衣冠雖別情皆好

主人愛翫不下堂  
清晨掃地坐焚香  
晴看似見孤雲起  
莫對疑間細草芳  
夫君平生於我厚  
記君新吟長在口  
長干一去無尺書  
謾對此圖嗟妙手  
一從作吏此事廢  
從前畫癖今除否  
遙知紫陌紅塵下  
每為雲山一回首  
人生適意在杯酒  
萬事浮雲亦何有  
君乎何日歸去來  
畫裡青山待君久  
此与後三首因題画而磨叙

倪元鎮画竹沈御史所藏

雲林之子有仙骨  
平生好潔如好色  
紛紛濁士等虫沙  
嗚呼瓚也何由得  
憶昔常登清闕堂  
鵲尾爐藝龍涎香  
紹京妙墨僧繇畫  
示我不啻千明璫  
人間萬事如飛電  
洗玉池空人不見  
季子城東土一杯  
何人為著黔婁傳



繡衣使者騎青駃曾聽竹枝湘水東歸來見此若夢寐  
巴陵洞庭生眼中江湖豪翰今零落君得此圖良勿薄  
愧我題詩憶故人黃鶴何年下寒廓

王元章墨梅

王郎志竒貌亦竒與世落落、噤莫施一朝騎牛入都市  
關吏不識誰何之歸來老作會稽客干戈歟起西南陲  
青袍白馬風塵裏越州城邊戰不已雄襟自許魯仲連  
一箭無成身已死世上空餘寫墨花只將名姓花光比  
於乎人生有才不盡用古來埋沒皆如此

錢舜舉溪峴圖

憶昔至元全盛日天子詔下徵遺逸吳興八俊皆竒才

秀郎王孫稱第一一朝玉馬去朝周諸子聲名總輝赫  
豈知錢卽節獨苦老作畫師頭雪白江南沒骨傳者希  
錢也得法誇精奇晴窗點染弄顏色得錢沽酒不復疑  
今人祇知重花鳥豈識此圖奪天巧玄雲抱石雷雨垂  
蒼山夾水龍蛇繞岸側溪迴共杳冥蒲稗深沉映魚鳥  
漁舟乍隨遠烟散客子競渡澄江曉自云布置師北苑  
只恐庸工未深了卷餘更有魏公題字擬鍾王差未老  
鄭侯得之恐神授使我一見喜絕倒雙溪流水清何極  
城外南山空黛色文章翰墨何代無二子儔能躡其迹  
為君題詩三歎息於乎古人難再得

吳興當元初時有八俊之號蓋以子昂為稱首而舜

八青居卷三  
舉與焉至元間子昂被薦入朝諸公皆相附取官達  
獨舜舉齟齬不合流連詩畫以終其身故二公之詩  
各言已志而子昂微有風意覽者當自得之也

胡廷暉畫

畫師我識吳興胡身長八尺蒼髯頽目光至老炯不枯  
藻繪萬象窮錙銖大兒十歲能操觚小兒五歲能含朱  
得錢但供酒家需時復縱博為歡娛魏公家藏摘小圖  
妙筆奚翅千明珠胡一見之神顏蘇以指畫肚潛臨摹  
落筆便與前人俱祝融撐空閣道孤朝雲暮雨相縈紆  
中天碧瓦仙人廬下有桃源風景殊雞犬似是先秦餘  
潯陽野客山澤臞自從喪亂遭窮途幸逢治世容微軀

堯舜亦有巢由徒已辨小艇長鬚奴便欲往從漢父漁  
江湖此境何地無

趙文敏公家藏小李將軍摘瓜

圖歷代寶之者常倩延暉全補暉私記其筆意婦寫  
一幅質公大驚賞亂真由此名實俱進故詩及之

送沈孝廉讀書天屏山

秋空雨洗芙蓉霜樹逸谷攢青紅嗟我欲游不可得  
子往畢業茲山中念子出身自紈綺秀如青松並蒿蓬  
十年奔走鍛毛翮黃金散盡家已空懷中一經不敢棄  
舍此將恐為昏聾束書上堂告父母雲深獨往無僕僮  
林僧谷叟頗敬客麈茶糲餅意甚忠身閑晝靜百事絕  
經史左右相研攻廷須跨海踏鯨背且莫瑣屑箋魚蟲

車良路端期不止跬步自可升華嵩學成靜俟時自至  
譬彼力穡適年豐朝廷懸膏待奇雋掇取五鼎榮三  
公古來孝弟神所相未必使子羸其躬塞子少學壯愈  
情聰明日損髣已翁世間有書未盡讀安得返老還為  
童跛蟹那由追驟耳贈子以箴情何窮倘有新知遠相  
教為我緘寄東飛鴻

贈義興宣瘍醫

長橋下壓蛟龍宮岸上人家如鏡中道人賣藥臨溪水  
醫得青蛇是龍子報恩不受千金珠龍伯親傳海藏書  
門前扶杖人如市妙術何愁三折臂燕支山前白草秋  
冷入金瘡淚欲流安得金丹從爾乞提携玉龍還向敵

王醫士杏林

山人種杏白雲中  
谷口花開千樹紅  
自惜朦朧帶朝露  
莫愁零落向春風  
春風幾度花間日  
煉得丹成應可食  
妙年有術濟人多  
况君自是餐霞客

與徐德望寫扇面就題

南州高士忽相見  
求我為畫白團扇  
戲拈秃筆掃雲山  
頃刻終南眼中現  
昨夜西風起天末  
坐使新涼奪炎熱  
勸君此扇莫棄捐  
不用留取待明年

雙節堂

奉化李公復祖母沈年二十生子七

月而寡子既長沈為娶兒女為婦生二子亦  
寡長公建次即復今皆已老故扁其堂云

鳳嘴鸞膠難續絃  
雙龍鏡破難再圓  
阿婆二十已守節  
新婦哭夫方少年  
大兒嬌啼母心苦  
小兒十月安知父  
破窓風雨來早秋  
夜續燈前共相語  
山頭松栢推為薪  
山前翁仲亦成塵  
紅顏憔悴垂白髮  
生死不慙泉下人

望雲思親

遊子辭親下江去  
東遊直到海邊寓  
水路迢遙難寄書  
空望白雲知母處  
駱駝橋下賈船稀  
美緡日、得歸遲  
舉首見雲低  
首坐此意傍人  
那得知焚香再拜  
雲中君  
願留阿母待兒身

華叔耕畫梅雪軒

好画誰如畢  
棗強墮馬折肱  
猶未忘何年  
寫此寒林趣

精絕未數左手王屋裏何人坐吹笛似是南昌郡中客  
曲終朔雪忽飛來開門滿樹梅花白

日上人深居菴

古栴僧在何處深居白雲裡禪心怎可擬虛空世事都  
將等流水長年柰足不辭山一日化衣曾入市間今碧  
澗浸楊枝戲採青松為麈尾幽間啼鳥窠不聞掌上戒  
珠聊復爾尚嫌宿習除詩句况肯勞生為妻子古栴僧  
誰得似

賜倭扇

東夷來語嗚呼 聖人當天九有服小臣螻蟻將安歸  
萬夫伐竹扶垂淚夜搗冰苔成側理製為鵲尾扇參差



再拜獻入金門裏 君王垂衣坐法官天飈謾、清秋  
同尚方受貢應無用今領徧與群臣共朝下從容外并  
臺人、襟袖南薰動倭扇來東夷平揚 皇風四海清

送金秀才歸侍

風吹歷陽樹石城悲早秋高堂入遠夢拂袖登吳舟金  
陵官酒如乳香酌君送君朱雀坊前日同來二三伴此  
時望君俱斷腸科名古來入共羨富貴不如歸故鄉年  
年隨計多辛苦十上風塵竟何補秋卷留將篋內歸彩  
水重看階前舞當時縣令親勸行今日還家父老迎門  
外清溪仍可釣山下古田躬自耕子身長健親長在黃  
金如山不可買君不見長安城中羅官客欲作布衣那

可得

趙千里畫

宣和天子開畫苑，畫史當時皆妙選。  
王孫公族總好此，精絕誰如趙希遠。  
君不見開元之中世，尚文宗室亦有  
李將軍。希遠師之得其妙，思陵寶重逾千鈞。  
松下何人白練裾，蕭散似是華陽君。  
展圖安得從爾去，相伴吹笙卧白雲。

高尚書畫

君家此畫何由得，峭壁陰森如鐵色。  
高閣平臨烟霧低，長松總舍雷雨黑。  
寒綃七尺半是雲，深林窈窕路莫分。  
幽尋恐與神明遇，靜聽唯應猿狖聞。  
海岳有圖絕低小。

後來作者何足云主人借問誰能爾定是房山高使君

徐士原畫

營丘老仙百世師後來學者有郭熙寒林平遠世豈有  
往、贗本傳其疑吳興徐卿好心手貌得郭熙定真否  
二三隱人長松下茅屋正對青山口前者迴顧後者恭  
抱琴偃僂隨孤童世間豈復有此輩定是栗里柴桑翁  
請君更試虎頭筆為寫我像祭其中

徐黃門畫

黃門給事三十餘面如紅玉少有鬚風骨豈是山澤癯  
問着只愛山中居前年版下鶴頭書徵起直上青雲衢  
文華堂高凌紫虛出入侍從陪金輿排方小帶紅羅襦

精神宛如馮子都朝下手拈八尺受左旋右轉風生軀  
有時自擘雙雕弧命中疊發誰爭呼歸耒賓客滿直廬  
京城酒貴不住酤爛醉坐叱蒼頭奴執燭寫此雲山圖  
方今臺閣多文儒似君才藝衆中無文宜侍中武金吾  
不負堂、美丈夫山中故人交不踈十年貧賤長相俱  
升沉忽如鳥與魚麋鹿敢逐夔龍趨見君此畫恒嗟吁  
關西行李今何如祝君名成歸五湖來尋高陽舊酒徒  
何辭解衣賞百壺卮君痛醉黃公壚

韓介玉画為童中州掌教題

我識河東老詞客鶴骨伶俜長八尺白頭徒步拾公卿  
人生變化誰能測將軍跋扈天為傾公持寸管力與爭

當時直氣動朝野至今文采傳諸生  
諸生白面今已老  
三載儒官空潦倒罷歸百事無所為  
萬壑千巖恣揮掃  
丹丘玄圃落眼前澗水松風鳴浩々  
由來絕藝出天機  
肉眼紛紛爭醜好吳興博士今鄭虔  
故山未歸雪滿顛  
今年召對席屢前蒙恩親賜水衡錢  
歸來見畫心茫然  
拄杖欲問金華船金華之洞小有天  
下與五嶽相鈎連  
初平鍊丹去成仙弟兄聯袂風翩翩  
洞前白石如羊眠  
我欲訪之何由緣安得與子相周旋  
飢餐紫霞拾瑤草  
石上一咲三千年

介玉乃張仲舉門人

陳仲美夏木圖

董元夏木不復見俗本紛々何足觀  
陳郎筆力能扛鼎

寫此千章生畫寒陰森似有神靈會偃蹇直作蛟螭蟠  
天雞曉鳴清籟發木客夜度雲旂翻林下文人行杖藜  
石根葉落失舊蹊孤童襍被向誰宿山風蕭々日薄西  
商岩紫芝自可食武陵柶花原易迷人間瀕洞不可處  
莫畏虎嘯并猿啼

姚運使溪山仙館圖

去年君為郡文學獨抱遺經憎命薄出門無馬坐無羶  
拜迎官長常作惡今年君為轉運使殊恩親出官家賜  
月給太倉三十斛况復官閒少公事人生貴賤反覆間  
世上悠悠那解此憶昨訪我當巖冬寫此溪山三數重  
驂騑一去了無影空有遺跡泥沙中間道河間故城裏

八靜居卷三  
十四  
開門遙見渾沱水何時為畫古邯鄲  
珠重函封寄千里  
去年冬姚君繼華過予戴山會飲順德堂為仲倫寫  
此圖今年春君遂以文學被徵陞任河間都轉運使  
矣喜而賦之癸丑秋八月望識

青弁雲林圖

前代何人畫山水長安關仝營丘李華原特起范中立  
三子相望古莫比亦有北苑與河陽後來作者誰能當  
米家小虎出逸品力挽元氣歸蒼茫房山尚書初事米  
晚自名家稱絕美藝高一代誰頡頏只數吳興趙公子  
當時弭節匡廬峰曾寫太平興國之神宮五峰却立疑  
爭雄臺殿突兀紛青紅中有雲氣隨游龍我對此圖卧

三日遂令奇氣生心胸  
亂來學士遭漂蕩  
文藝草誰能工筆精墨妙心更苦  
那得再有前賢風  
於乎乾坤浩蕩  
江海濶使我執筆將安從

費景祥索題徐幼文寫蕭山古寺圖

山人手持酒一卮  
長跪向我求新詩  
自言此畫君所識  
乃是河南使君之所為  
砥崖怒瀑形崛奇  
天門閣道相因依  
中有臺殿橫天梯  
金繩碧瓦光參差  
使君當年作此時  
祇是昂藏一布衣  
豪雄意氣今已極  
圖画應知得者稀  
右丞輞川不易致  
此公名位豈卑微  
請語世上悠悠者  
人生貧賤安可欺

丘大卿天柱峯圖



昔聞安期生飄飄入秦京上書三月初報罷拂袖去作  
蓬萊行却咲叔孫通俯仰咸陽城長生亦何補身後留  
空名何似長安少年客天柱峯頭萋白石朝辭猿鶴下  
雲中暮逐夔龍侍君側綉衣乘駃馬蹠躐臺城下愛道  
心不忘歸來坐清夜太平天子親齋祭新擢祠官捧珪  
幣紫壇醮火曉如星獨着衮衣朝上帝翻思舊隱地石  
室生青苔來時壁上蒼龍劍七星剝落空塵埃丹砂不  
復化蘿衣誰更裁人生窮達會有命何須千歲如嬰孩  
草衣木食苦復苦王喬偃佺安在哉寄語空山舊泉石  
不須為我生悲哀功名倘遂乞身願萬里青天騎鶴來

陳昇畫馬

開元之中馬獨盛秦漢以來難及之豈惟監牧效才力  
盡史往々稱神奇拳毛玉花最難寫祗許曹霸名當時  
亦有弟子沙苑丞不解骨法空毛皮近代吳興趙公子  
涯洼水應通硯池房星筆底倏躍出雍也其子名相馳  
後未陳昇號入室昇今已老繼者誰青桐颯々涼風吹  
奚官朝出試馬時前者迴顧後者隨精神不動鬃毛垂  
唐家四十三萬匹如此駿骨亦恐稀於乎世間駑駘方  
滿地安得覩此真龍姿

再題暉山水

近代丹青誰第一精絕獨數吳興胡魏公家傳摘瓜圖  
將軍妙筆絕代無年深粉墨紛糝糊公命胡也全其汚

鷗波亭前山滿湖賓客不來人跡踈以手畫肚私傳摹  
歸來三日神始甦下筆直與前人俱今人不見古人畫  
古画自與今人殊嗚呼眼前不復見此物吾并購之千  
明珠

山泉隱居齋

入直回為雲間朱卿題

日長侍立南薰殿 聖主從容正開卷內臣如鵠攤圖  
書詔許近前曾一見玉躡金題照眼新三王二李迹未  
陳妙筆森芒洞冥漠乃知今人非古人歸來三歎北窓  
下開屏見此新圖畫流淙百折掛石梁古木寒松勢相  
亞木末何人一草廬山泉之人昔所居鴻臚寺裏晚朝  
下對此高堂心鬱紆華亭泖湖眼中見武陵樵源路豈

殊老夫曾住康王谷五老香爐映飛瀑亂來井曰今可  
存因爾高歌望黃鵠

送石隱君還匡廬和車景璜韻

五老峰高翠烟濕金碧芙蓉半空立香爐絕頂多奇踪  
白雲片片團秋八謫仙昔年登此峰身如神人氣如龍  
九江秀色厯攬徧直欲此地巢雲松石公今登此峰抄  
奪得天香滿海島種松巢居雲上頭雲月松風長不老  
從此青山欣有主靈鶴琅然作人語掛冠吾亦盍歸來  
共爾雲深卧煙雨

臨房山小幅感而作

近代丹青誰家豪南有趙魏北有高風流雄混各臻妙

下視劉商兒女曹百年零落作者少丈夫文藝俱草  
山川靈氣何代無我縱有心嗟欲老君不見房山翁曾  
寫太平興國之仙宮五峰秀出青芙蓉雲氣鬱鬱如游  
龍千金珙辟去不可博一朝焚棄隨飄風世間神物久已  
化紛々粉墨何由工嗚呼古今鑒賞非具目荆璞淪為  
燕石同乾坤浩蕩江海闊使我執筆將安從

靜居集卷之三

靜居集卷之四

潯陽張羽來儀著

五言律詩

尋春

朝來微雨罷何處可尋春  
冰散池容動烟銷柳意新  
穿林聽鶯遠度陌問花頻  
但覺相逢處情親似故人

尋梅

策杖度林塘幽尋犯曉霜  
臨池疑掩映傍竹畏遮藏  
欸曲敲僧舍徘徊繞苑墻  
好携三弄笛樹底為催粧

早春旅懷

遠客歸未得東風冷尚嚴  
燒痕山頂禿春色柳眉尖  
病久醫方熟貧深酒債添  
浮生欲何以朝暮為藿藍

山中春日書懷

溫飽非吾志，軍瓢樂固窮。雲知世變對，竹悟心空大。  
卧庭花日鶯啼野，樹風市廛榮辱事。那得到山中。

山居

古書堆滿架，柏子當香燒。好句無心得，閑愁轉眼消。  
野茶和月煮，畦韭帶春挑。賴有天知我，生耒懶折腰。

吳城覽古

故國有荒臺，登臨一愴哉。櫺廊風落蠹，香徑雨生苔。  
苑廢民家占，城摧客吊來。伍員當日語，千古尚堪哀。

寄王隱君止仲次高季迪韻

春江念久違，獨掩雨中扉。新水添漁網，初晴稅蠶衣。  
饌

餘憐笋嫩酒熟惜花稀在客偏相憶韶光去若飛

遊虎丘

春入翠微深春風吹客襟相携木上座來禮石觀音老  
樹積古色薄雲生晝陰林僧脩茗供默坐契禪心

蚕婦

行々及暮春浴子約比隣選地安蚕室燒錢禱社神守  
筐臨鏡懶摘葉度溪頻辛苦輸官罷私衣僅蔽身

杜宇

國亡知幾代啼血轉聲頻爾自無歸處何須苦勸人烟  
深青嶂曉花落故城春任是心如鐵聞時亦愴神

江村夏日



江村夏景深蒲稗綠沉  
浣女朝相問漁舟晚共尋  
晴雲飛石燕夜雨聞沙禽  
一聽滄浪調懸知訝此心

夏夜舟中

畫舫暮未過風傳子夜歌  
簟紋涼更淨荷氣夕偏多  
落月斜筇柱流螢拂扇羅  
此中無限意其柰曙鐘何

湖上避暑

湖山疊翠螺湖水鏡新磨  
一夜雨聲歇滿天涼氣多  
菱荷香几席風月醉笙歌  
少壯不行樂人生柰老何

蓮花

似錦覆池塘南風始散芳  
龜遊盤影淨魚聚蓋陰涼  
綠折含冰縷紅殘露碧房  
誰家蕩舟女照水聞新粧

涼夜

金氣已呈秋  
新涼入夢幽  
閨人砧欲動  
侍女扇將收  
玉露清瑤簾  
銀河繞畫樓  
更憐今夜月  
隱隱樹西頭

聞蛩聲

微羽感秋鳴  
爭先似不平  
輕隨殘漏斷  
細雜遠鐘清  
寂歷催寒意  
殷勤勸織情  
遙知孤枕客  
白髮此時生

夜宿山房

清絕早秋天  
禪房碧嶂前  
草虫依定石  
竹露潤爐烟  
月靜蓮花漏  
風披貝葉編  
此心無所著  
應解悟初禪

江晚旅懷

短長亭下景  
引睇入吟哦  
踈樹立寒色  
短烟行夕波  
山

空秋氣老江遠客愁多  
力動匡廬興白雲生薜蘿

次韻高季迪別後見寄之作

客中原少寐看月上林端  
鴈叫楓江夜人栖野艇寒  
浮踪憐斷梗攪夢怯奔湍  
不是孤吟懶離群自少歡

秋夜旅懷

命與時相厄勞生空瘦形  
苦吟詩有債久病藥無靈  
夜雨和愁落鄉山入夢清  
歸心逐孤鴈飛過浙江亭

客夜有感

十載紅塵海漂流嘆此身  
山川孤館夜風雨獨眠人  
嗜茗真成癖工詩不療貧  
還家湏及早垂白有雙親

池上

秋水轉庭柯臨池晚興多禽閑栖缺岸魚戲動涼波露  
浥將衰柳風欲敗荷雖無江海思咫尺得頗過

歸燕

歸夢入烏衣秋風侶漸稀辭巢猶反顧戀主尚低飛海  
闊迷烟島樓空鎖落暉寂憐江上鴈歲々每相違

秋日寄山中隱

思君住翠微每與世情違林靜猿看果山深虎守扉養  
生叟木餌備冷製羅衣遙想新秋日虫鳴葉始飛

冬日寄友

小雨變輕雪餘寒欺酒卮忽來千里別又是隔年期世  
路誰青眼人生易白髭幽懷禁不得沙上立多時

約徐隱君幼文同隱吳興

吳興好山水子我盍遷居統郭群峯列迴波一鏡如蠶  
餘即宜稼樵罷亦堪漁結屋雲林下殘年共讀書

耕漁軒題寄徐良夫

之子住銅阬人傳好事名如何同甲子翻遣味平生野  
岸風中釣湖田雨後畊秋天漸涼冷或可赴前盟

送金文學入

移宅近關市里間相見稀授徒仍自學訪舊暫言歸廢  
圃荒秋雨空房鎖夕暉好尋舟楫便來往莫相違

送呂道士

石室無人住歸心似鶴輕山君驅虎去童子報丹成玉

竇憑龍守芝田借雨耕懷君明月夜遙聽步虛聲

遊黃龍洞

石路少人行山深草樹平寺荒餘舊額龍去只空名深  
洞通雲氣飛泉作雨聲素懷棲遁志到此遂幽情

吊鶴

鶴壽可千年傷身竟莫全羽衣埋石室仙夢返芝田妙  
舞何因見清音詎可傳山人空蕙帳夜月照孤眠

寄吳有本

相思不可見夢裏却逢君兩地共明月一方空碧雲江  
秋鴻背侶山夜鶴離群記得湖邊寺詩題醉後分

答劉秀才送竹杖

一枝蒼玉瘦雅稱地行仙不但挑詩卷猶堪挂酒錢看  
梅敲雪落引鶴卓苔穿只恐風雷夜化龍飛上天

送人之平江投刺李守

送君何處遊一劍古蘇州螭螭黃花節鱸魚碧水秋尋  
碑松鵝寺按曲酒家樓况爾多能者膺門必見留

孫景翔幽居

厭踏軟紅塵閑居江上村養魚寬鑿沼愛竹別移門月  
色侵書幌山光入酒樽我慚行役擾猶未卜田園

送劉仲鼎歸杭州

欲別又牽衣傷心故舊稀自憐爲客久不忍送君歸遠  
岫明殘雪空江淡落暉東風重回首一鴈背人飛

贈王商翁處士

家住鏡湖陰，龍鍾雪滿簪。  
一生欠詩債，半是忍飢吟。  
有水釣明月，無錢脩破琴。  
鷗飛雨下，句聲價出鷄林。

送暨陽田丞

三載浣花溪，松邊日賦詩。  
一官清似水，衆口好如碑。  
明月輕歸棹，清風亂綵旗。  
怪來肌骨瘦，為不食民脂。

越上別苑景文

君家難弟兄，當世結詩盟。  
五字關風雅，千年說姓名。  
遠烟拖柳色，薄月瀉灘聲。  
又作耶溪別，何時話此情。

隱者山房

家住白雲深，好山青對門。  
樹肥花結子，土暖竹生孫。  
猿



靜居集四  
六  
挂枯松折半行淺水渾自云歸隱後懶與俗人言

讀呂芳卿吟卷

一編總百首詩好不須多半世尚清苦五言能琢磨淡  
中有含蓄平處忽巍峨深夜挑燈看使人消睡魔

劉國寶隱居

三徑歸來日生涯付醉鄉自言行路險不似在家強風  
撼松聲冷雨蒸花氣香如何閑未得猶為作詩忙

山陰曉發寄暨陽舊友

水漲官河遠西風去掉輕四山猶暝色萬木盡秋聲村  
近聞鷄犬天寒憶弟兄故園歸未得漂泊若為情

詩窮

道在何妨拙身安一任貧已知如意事不遂苦吟人瀑  
布空山月梅花破屋春奚囊有佳句未肯寄朝紳

客夜懷王英甫

半生江海上猶未卜菟裘今夜鴈初過他鄉人正愁青  
燈孤枕夢黃葉一庭秋何日尋歸棹山陰訪子猷

席上聞歌妓

艷色傾前席高歌度遠楹羞多時掩面嬌重未成聲淺  
按紅牙拍輕和寶鈿箏周郎知誤處衆裏窠多情

王昭素吟窩

一室如斗大半生常忍飢隨身無長物到處愛吟詩燈  
下坐搖膝月中行撚髭不須將此意輕與俗人知

贈陳逸人

蛾眉山下住貌古骨清竒  
劍在神應護丹成鶴未知  
有錢須換酒無日不吟詩  
却訝多人識孤琴到處携

山中荅高彦敬

矮屋兩三間無榮夢自安  
好山看不厭終日坐忘餐  
書就松根讀琴來石上彈  
浮生閑是寶何必望為官

天目山

東西峯對峙藤廬日成群  
四月猶飛雪半山長是雲  
洞香仙藥徧天黑聖燈分  
千古錢塘勝登臨愜素聞

倪遜翁自在廬

居然入境外不為利名移  
四壁空無物一身閑有誰  
孔

明高卧日康節獨吟時下視塵埃裏勞生易白髭

文心之訪予山中

遠訪孤峯頂涼荒見道情別來多少事話到二三更燈  
影搖空壁茶香出破鐺山中無一物何以贈君行

寫懷

心上無俗事禪餘只好吟命窮甘白屋身健直黃金世  
路劔關險侯門滄海深虛名何必尚吾志在山林

愛梅

我愛梅花好情同骨肉親瘦於唐島佛清似楚湘臣折  
處香浮樹吟時雪滿巾孤山林處士應想是前身

書自真

不入君王夢徒勞顧愷王有身皆幻物無相即真空大  
節死不變五行生得窮髮毛惟欠白好箇住山翁

贈何秀才歸釣臺

雪上鬢痕新歸耕碧隴春可憐窮作崇空有術如神野  
筵多黃葉寒江老白蘋斯文天未喪將見起陳人

答畫者問詩

要識詩真趣如君畫不同機超罔象外妙在不言中珠  
蚌照滄海玉蟾行碧空安能起摩詰握手話高風

塵事

春未秋又去塵事轉茫茫天下若無死人間應更忙燕  
銜泥葺壘蜂釀蜜為房獨有幽棲者眼高空八荒

重過楓橋

晚泊楓橋市，冥搜憶舊遊。  
月明天不夜，江冷水先秋。  
岸曲依漁艇，林低出戍樓。  
堪嗟名與利，白却幾人頭。

滕州道中逢卜德夫

相逢同是客，清話見真心。  
四海皆兄弟，三生一古今。  
冥鴻思碧落，病鶴戀青林。  
歲器期堪用，斯文未陸沉。

呈林旦翁

公車徵不起，高枕白雲眠。  
五字詩中妙，一名天下傳。  
書窓分夜月，茶竈出晴烟。  
冷淡生涯足，梅花繞屋邊。

玉泉山中懷李景山田師孟二公

鴈落蒼烟外，蟬吟夕照中。  
與誰論古道，獨自立秋風。  
遠

青居集四  
九  
岫青無數晴波碧四室故人成久別不見寄詩筒

訪孫伯宇明府別業

風流如靖節出處自分明  
昆仲多黃甲交遊少白丁  
掬泉搖樹影枕石落松聲  
不下青山去月高門尚扃

倪隱君歸越

君歸何處所迢遞浙江東  
千里故人別一尊今夜同  
鴈愁燈影外蛩響月明中  
潮水將離思茫茫逐去篷

送同行省親

送子綠楊堤楊花如雪飛  
相看忍相別同出不同歸  
鴈背夕陽遠馬嘶春草肥  
北堂慰孤寂喜色動斑衣

旅懷

寒落無人問青尊獨自斟  
思親兩行淚倦客十年心  
貧久難禁病愁多欲廢吟  
歲寒誰可語莫逆有孤琴

梁校理歸杭

交情方脫畧忽爾話歸期  
萍水相逢處梅花欲寄時  
蝦多投店懶馬瘦到家遲  
去日西湖上西風柳末絲

永康道中

石路多盤折秋陽尚鬱蒸  
矮墻低貼水老樹倒懸藤  
白髮腰鎌叟緇衣頂笠僧  
村醪何處問更入亂雲層

過瓜洲

落日瓜洲渡餘寒透薄衣  
客囊空蕙蕊改春色自薔薇  
江遠水東去天晴鴈北飛  
故山千里外昨夜夢先歸



浮生

浮生空後、誰肯死前休。今日復明日，黑頭成白頭。百年身世夢，兩字利名愁。輸與僧閑好，眠雲看瀑流。

隱者山房

一龕居絕頂，門外衆山橫。池小魚能活，庭荒草亂生。窓虛延月色，林遠隔鐘聲。俗客不得到，主人無送迎。

贈唐師善父

唐君天目佳，詩律有唐聲。父子同機軸，江湖識姓名。秋風吹破屋，夜雪洒寒檠。自說負如許，儒冠悞一生。

送金子仁之桐廬

不必念離群，男兒看策勳。子能行此道，天未喪斯文。雨

氣沉江樹春帆帶海雲  
憑將無俗句一說向桐君

山陰王商翁

江湖叅請徧方外又談禪  
日用工夫到天然句法圓  
地爐寒撥火古硯濕生烟  
清白傳家術靈苗茁石田

寄劉仲昂山長

我已浮屠隱君仍冷掾  
遊向人空說項何地可依劉  
風雨殘燈夢關河落木秋  
近聞吟更苦應是雪盈頭

次李景山韻

道人無可愛所嗜特清吟  
墨痕沁春雪燈影搖秋霖  
試將不龜手用鼓無絃琴  
此意許誰會思君滄海深

送客還山

乍見即言還望雲歸遠山舟行白鳥外路出綠陰間隣  
父開松徑家童掃竹關世途方擾上誰復似君閑

藥徑

藹上復上新苗綠滿畦後蓉移得小枸杞剪能齊曉  
灌閑塘水春分遠澗泥非因事服食聊此適閑棲

寄蘭壑宗長

同宗同在旅彼此繫微官所去無多遠其如相見難連  
雲秋樹老卷雪莫濤寒幾度空江上思君獨凭闌

寄大滌山道士

思君不可尋幽夢入雲林碧洞千年古青山九鎖深無  
糧上白石有訣化黃金遙想松林下焚香理玉音

遊山寺 以下皆方外作

紅塵飛不到一寺倚巖陰  
松老知僧膺潭室悟佛心  
古碑蒼蘚合踈磬白雲深  
坐久生幽思斜陽下遠岑

訪道衍上人時寓海雲

尋僧自補屐古寺夏雲中  
聽鳥明聞姓看花悟色空  
風傳烟磬遠竹引野泉通  
便欲捐塵累香燈事遠公

解嘲荅祐上人

世外難為友吟邊僅得君  
寄將西岳句差似北山文  
衆雀爭叢棘孤鴻恣舊群  
誓須同白社志不在青雲

讀珣師潛山詩集 夜坐

詩從心悞得字上合宮商  
一點梅花髓三千世界香  
卷

翻燈影斷葉墮漏聲長遠想人如玉何時扣竹房

重遊淨慈憶沆禪師

慧日峯前閣重來百感增空存黃面老不見白頭僧遺  
偈書猶在埋銘刻未曾有詩行已久何必上傳燈

杭州護國寺無門開師道場有龍洞在焉

山脉未天目名高甲衆峯安知巖上樹不是洞中龍寺  
小多僧住祠靈有勅封無門那得見塔影暮重七

別英上人

話別踟躕甚江亭酒一危定交元不薄重會豈無期坐  
久風生納吟深雪滿髭明朝相憶處山月倚蓬時

徑山夜坐聞鐘

涼風生毛骨天高露滿空二十三年事一百八聲鐘絕  
頂人不到此心誰與同凭欄發孤嘆宿鳥起長松

詩禪

詩悟必通禪功深自入玄句非專鍛鍊妙只在空圓春  
草池塘夢梅花水月天象千載下此意少人傳

與徑山高禪師

參禪非易事況復是吟詩妙處如何說悟未方得知天  
風吹沆瀣霜月照連漪賴有師兼善當今一白眉

寄贈一見禪師

名藍不肯住招隱始中年白日無來客青山獨坐禪磬  
敲松頂月茶煮澗心泉見說嚼花糜時未坐下眠

讀宗祐上人高僧詩

一集半千首水花玉屑妍行須隨手看病亦枕頭眠不  
作烟火語自成文字禪倘非知道者慎勿易流傳

寄祖雍上人

破衲捲秋雲入山深更深似聞營梵剎應不碍禪心寒  
瀑瀉蒼壁晚花生石林遙思明月夜誰聽穎師琴

送僧之華由行化

華亭多勝槩此去幾時還古寺寒林外荒城野水間地  
靈偏有鶴海近絕無山龐老知音者相看必破顏

禮覺菴真禪師塔

一死雖無憾生平亦可憐道高人不識悟妙世空傳舍

利光含日浮屠影接天脩名清似水宜塋太湖邊

呈天目山高峯和尚

岑坐深雲裏巖扉盡日高齊眉髮半白信口語多靈入  
定山神護談禪野鹿聽何時香一片夜立雪中庭

贈淨慈元師

僧中麟一角尊宿遍叅來詩體得活法禪心如死灰看  
雲寒坐石踏雪曉尋梅湖上經行處沙鷗見不猜

贈新公雲巖

多年南宕住心事白鷗知懶出因嫌俗無謀自識時老  
猶堪入衆負只好談詩想透靈雲句禪關已不疑

題海雲寺真禪師道行碑後

西菴慧長老令師



空色俱明了何心涉世緣高名爭共仰頑石底須鐫笈  
笥無遺物衣盂有的傳西菴今跨竈光照海雲邊

宿睦州祖師菴

菴依兜率寺小憇俗心灰竹密暑不到窓虛風自來山  
昏飛鶴下磬斷定僧回拂拭殘碑看年深厚綠苔

六池菴

絕頂菴雖小靈踪遠近聞天將六池水澤及一方民猿  
叫蒼崖月龍歸古洞雲山翁頭似雪不識市廛人

勝禪師遊廬山

飄然廬岳去破衲共枯藤此地山林勝令人肌骨清蓮  
開千柄雪瀑挂一條水五老如相問煩君為寄聲

送明上人遊方兼寄蔣山申禪師

忽離天目遙問石頭如何當九夏獨自上孤舟  
必乘時出身須為道謀謝即今老大月下正垂鈎

古澹文本心

一片白雲心飄出世塵禪叅迦葉妙詩逼貫休真倚  
竹風生袖尋梅月滿身老耒堪慰意林下見閑人

贈僧還日本

杖錫去隨緣鄉山在日邊遍叅東土法頓悟上乘禪  
水龍歸鉢翻經浪避舡本來無去住相別與潛然

以上二十五首皆為方外作

五言排律

眠雲軒

漠々復依依、蘿房晝掩扉。凝衾輕學絮，拂折亂成衣。未  
甯從龍去，應同化蝶飛。彩文低慢影，濕靄和鑪霏。觸石  
濃蕪淡，為霖去復歸。却憐塵土夢，空遶画屏圍。

綠水園燕集

芳圃逼江城，迴波遠含清。主人擅文學，過客總簪纓。通  
向吳中會，何殊洛下英。唐虞共敷講，風雅用和賡。鬢鑠  
攻辭健，鏗鏘得白精。建安方合體，大曆却徒名。還展花  
前席，仍敲竹下枰。吟餘歌杖杜，醉裏聽倉庚。徑竹班初  
脫，庭蕉綠已呈。渾忘在離亂，惟欲盼承平。蝸窟休圖隱。

雞壇可負盟從容四美具感激二難并更願相加勉留  
傳汗簡聲

詠雪

含羞待暮天六出總勻圓白變山川態威分造化權舞  
風呈窈窕拂水鬪蹁躑乍積那能久頻銷不自堅光應  
欺楚玉色更勝宮鉛到處堆填滿何人剪刻全梅花漸  
艷冶柳絮護輕妍入隙寒禁坐穿帷冷逼眠凝祥催餞  
臘呈瑞報書年欲擬梁園作抽毫賦短篇

春寒

東風曉作惡漠漠艷陽天緼服收重着紅爐罷復燃魚  
潛池未泮鶯困柳空妍冷落張燈雨淒迷拾翠烟愁顏

銷綠酒凍指怯水絃可惜尋芳日空成掩閣眠

立春試筆

頌耕方獻歲占斗又逢春萬乘迎新日千官侍宴辰  
葭灰初應午木德以為寅詩進泥金帖釵懸綵勝人銀塘  
消宿冱紫陌起香塵行路踏青侶遊賞敢逡巡

題太守談侯蔽御書

閭闔開金殿天官侍禁闈龍旂迎翠輦寶扇隱珠衣天  
語親垂問奎星墜若飛皇威瞻咫尺教命及依微拜  
舞承恩渥歡娛捧詔歸臣僚驚異遇筆硯發光輝展視  
人皆羨叔巖衆所稀終當導聖訓千里守名畿

靜居集卷之四

靜居集卷之五

潯陽張羽來儀著

七言律

早春遊望

燒燈城郭嫩寒天，早覺春光滿眼前。  
山翠全輕猶帶雪，柳絲纔長便宜烟。  
佳人挑菜寧辭遠，公子尋芳各鬪先。  
從此陌頭車馬動，誰能閑坐負華年。

春雪二首

不肯呈祥向臘前，却來迎瑞入新年。  
鬪粧已落梅花後，學舞還居柳絮先。  
久積已迷芳草地，易消還避艷陽天。  
遙知大輅躬行處，共賀瓊瑤滿舜田。

亂逐春烟上客衣，悠悠颺颺又霏霏。  
隨風已後梅花落



青房卷五  
撲地應先柳絮飛  
鬪舞艷陽消  
復聚乍飄芳草積  
還稀  
無端誤却尋芳約  
獨擁寒爐掩竹扉

仲春遊望

春來結伴共閑行  
此日山川色更明  
望裡樓臺多見柳  
靜中阡陌但聞鶯  
江蘼色帶王孫恨  
蜀魄吟傷帝子情  
莫道韶華鎮長在  
落花看已滿東城

寄宋校書仲溫

郡泮宮邊對雨吟  
別懷清裁到于今  
聽鶯已謝春風夢  
種菊應期歲晚心  
鏡裡流光催白髮  
床頭舊物罄黃金  
大家共仰臨池筆  
妙逼鍾王趣已深

春日登戴山懷舊

選勝尋常此地行，春日望湖更明白。  
浪遙連陽羨樹，青山半掩闔閭城。  
樓臺高下千家柳，阡陌東西幾處鶯。  
忽憶從前舊游伴，無端愁思一時生。

過吳即景

片帆迢遞入吳烟，竹淑蘆汀斷復連。  
柳蔭濃遮官道上，蟬聲多傍驛樓前。  
近湖漁舍皆懸網，向浦人家盡種蓮。  
行到吳王夜遊處，滿川芳草獨堪憐。

首夏閑居

門巷開臨曲水濱，綠陰悄悄四無隣。  
雨餘高笋初迎夏，風逗殘花尚駐春。  
倚杖多因聞好鳥，開樽每為愛幽人。  
踈簾清簟終朝靜，只有琴書自可親。



湖亭納涼

汎舟曉入水雲鄉，亭子高、午更涼。白玉柄寒揮麈尾，  
黃金鴨冷試沉香。榜人弄沫翻荷影，侍女調冰壓蔗漿。  
不信長安名利客，黃塵赤日幾多忙。

夏夜宿道場

山僧結夏獨安禪，對客談空石作筵。架上金經傳白業，  
庭前翠栢長青年。松廊月冷驚棲鳥，石室風清滴暗泉。  
擬就遠公脩淨社，共持巾拂斷塵緣。

夏晚泛湖

綠柳陰中艤畫船，芰荷香裡聳吟肩。雷聲驚動雲頭雨，  
塔影倒搖波底天。群鷺遠明殘照外，一僧閑立斷橋邊。

菱歌裊々知何處滿袖清風快欲仙

川上暮歸

此地頻經畫舫過暮歸原不畏風波  
烟中漁網懸楊柳浦口船燈照芰荷  
歸鳥去邊行客少夕陽盡處亂山多  
此時詩思渾無賴聽得前溪子夜歌

秋日郊居

蕭々晴日戶庭幽無數青山枕碧流  
白露兩餘砧欲動黃花風冷扇初收  
雲迷征鴈牽秋夢烟引寒蟬急暮愁  
此際不堪搖落恨蒹葭如雪滿汀洲

次韻高季迪寄江上丁至剛

華門踈柳近漁家潮落秋江淺露沙  
俗吏催征禾未熟

良朋訪舊酒須賒霞生前浦天將雨露冷東籬菊未花  
却嘆年來貧亦樂阿兒學寫字如鴉

秋夜宿僧院

古寺昏鐘日已沉禪房花木自成陰流螢遠度還依草  
宿鳥驚飛不出林僧磬和泉清客慮佛香入院淨人心  
夜深共講楞伽字始識空門義趣深

秋齋早起

高齋獨宿寢衣輕覆簟餘香似有情門掩青苔秋淡泊  
心同白露曉澄清新詩夜得思貽友靈藥朝飡學養生  
但乞閑身長似此已將雲霧等浮名

秋日登戴山佛閣

風物澄明宿靄收，登山欲盡更登樓。  
一行白鴈投南下，百道清溪向北流。  
野嶂雲歸初歇雨，湖田稼熟始知秋。  
空門寂寂無塵事，聘望端能散客愁。

九日登山

人生能得幾重陽，此日携壺引興長。  
白髮已添今歲色，黃花不改去年香。  
中天雨露開新節，下界山河繞上方。  
正好登臨拚一醉，龍山遺跡久荒涼。

歲暮山居

寂寂閑居隱翠微，蕭蕭寒日暎柴扉。  
葉聲亂響莓苔屐，雲氣時生薜荔衣。  
雪滿石床門閉早，草侵碁局客來稀。  
歲寒正好看書卷，不用登高怨落暉。

雪意

六花欲墜尚遲遲，應是裁冰未就時。  
人倚高樓風寂寂，雲連平野柳垂垂。  
飢烏獨噪荒城堞，凍雀群棲碎竹枝。  
遙憶梁園趨宴客，抽毫應擬賦新詩。

除夕

季冬今夕年華盡，開歲明朝節物新。  
時令漸交初換曆，客愁偏動未歸人。  
暗知春入椒觴重，坐覺寒催玉漏頻。  
遙憶鳳城鐘鼓動，千官拜舞向楓宸。

送李文學還江右

亂後還鄉世所稀，喜君漂泊獨能歸。  
英雄割據今方定，城郭人民半已非。  
浮梁渡口衝時雨，彭蠡湖中看落暉。

聞道宗人相待久榮華何必錦為衣

江館漫成

雞犬相聞自一村兵餘禮俗幾家存  
蕪葭渚冷哀鴻度禾稼場空凍雀喧  
三策徒勞懷董子一食誰復念王孫  
江天悲感年将暮雲樹離離欲斷魂

贈趙似之架閣

萬人叢裡獨知機六、金鱗避釣時  
靖節歸來多嗜酒休文瘦損極耽詩  
草青湖岸春遊健潮落江城夜卧遲  
老去清豪渾未減一驢猶向雪中騎

行樂過西嶺

白日都消筆硯間偶因行樂到松關  
秋聲不盡蕭蕭葉

夕景無多淡々山蛩響寒齋僧自定苔荒深院客常閑  
已知身世俱成幻莫嘆西風鬢易斑

贈一初國錄

兩鬢秋深世念踈竟攜琴鶴賦歸歟子期心古金難鑄  
常老詩成錦不如負郭有田都種秫杜門無事飽觀書  
曾襟可是容塵俗翠竹千竿繞故廬

送徐君輔歸嚴陵

鏖戰文場四十年歸來鬚髮已皤然可憐東魯辭家客  
又逐西陵上水船沙漠風高孤鶴落汀洲春暖白鷗眠  
故山一去音書斷極目遙林起暝烟

殘臈夜書

百年時序渾能幾眼底推遷亦可哀  
歲景僅隨殘燭盡春聲還逐晚鐘來  
烟林衆鳥知更語野館孤梅應候開  
預計明朝好風色與誰乘興一登臺

元日試筆似吳黃二友

草綠南園裏曉塵水開池色動龍鱗  
天邊北斗迴今日江上東風似故人  
莫憶往時悲往事且將新句答新春  
餘生願見昇平日長對青樽壽老親

立春日吳黃二友有作因和

隣舍蕭疎水竹連共看原野變風煙  
青春又數從今日白髮應多似去年  
世上浮名都莫愛客中佳節且相憐  
尋思歲計渾無物只益新詩數百篇



僧居寒夜

上方臺殿駐餘暉，露下烟寒獨掩扉。  
山木蕭條啼鳥歇，道門清淨俗人稀。  
鐘蕪遠籟回鄉夢，鴈帶新涼到客衣。  
擬約許詢同下榻，自憐幽興每相違。

山館蕭條寢復興，經聲遙出最高層。  
客愁無伴依童子，禪學多難憶古僧。  
塔下鳴蛩沿定石，竹間棲鷓避懸燈。  
遠遊亦有幽居志，擬絕塵緣愧未能。

寄王止仲高季迪

祗恨孤城未解圍，圍開蕃遣別相知。  
夕陽江上忽、酒細雨、灯前草、詩有夢、直送、花落後、無書空、過鴈來時。  
郭西古寺題名處，今日重遊却共誰。

本葉原闕據豫章叢書本寫補

別後吟成許寄無定知詩境不荒蕪新詞曲膽推摩詰  
古體優長羨達夫華岳羣峰雲霽出梁園萬縵日晴敷  
肯從大曆開元已重擬清談學唾壺

吳興南門懷古

郭門南面似襄州野樹寒山對倚樓公子城空無食客  
霸王宅外有荒丘夕陽冉冉仍西下秋水茫茫共北流  
只是今時已惆悵不應更為昔人愁

送谷克讓回南侍親兼柬李中卿貳尹

五兩風生楚客歸夢魂先已到庭闈九疑舜冢蒼梧野  
三國周郎赤壁磯天地悠悠人自老江山鬱鬱鳥空飛  
若逢李白煩相問別後平安一字稀

登德清百僚山

湖鄉風景三秋後佛界軒亭四望開碧水番從城裏過  
青山直到縣前來魚商酒市晴偏集釣艇蓮舟晚共回  
自古登高能作賦坐中誰是昔賢才

寄述古道上人

選佛場中讓長年愛投靜刹寄高禪法身謾應天人供  
世諦無通內外篇月照袈裟行道徧花飛如意說經圓  
聞師剩有藏書在擬借蓮房未有緣

九日登道場山同吳逸人賦

忽驚九日當今日同在他鄉望故鄉百里山河天盡處  
萬家城郭水中央惟聞風動聞靈語寺裏林疎見佛香

不是避喧來此地無妨曉暎到斜陽

菁山石梯閣與方二彝徐七賁周二復夜坐

忽逢晦日驚春盡為倚高窓到夜今獨鶴夢酣西嶺樹  
老僧定入上方雲泉聲落磬室中辨花氣穿林暗裡聞  
莫道暫時留愛賞移家終擬避塵氛

贈僧玘

辭家譯遍五天書避亂聊尋廢刹居片月池中觀色相  
千花塔下禮空虛行隨流水因齋後坐得新詩是偈餘  
聞說到城還不住予生汨、意何如

儀舟孺山懷徐孺子

登高懷古重徘徊試薦山泉當酒杯此地不聞懸榻待

當時應吊東芻來，鴿棲壞棟殘僧散。  
風動寒燈古殿開，千載南州寥落甚。  
獨尋遺跡繞蒼苔。

奉同西軒先生前立看梅

最愛前村幾樹梅，千花萬萼映春開。  
空憐地主能栽得，却少閑人為看來。  
弱蕊愁風低着水，瘦枝嫌雪淺封苔。  
不因重度溪橋險，杖屨應逾日數迴。

唐村良溪居

高齋每到思無窮，門巷玲瓏野望通。  
片雨隔村猶夕照，疎林映水已秋風。  
藥囊詩卷閑行後，香炷燈光靜坐中。  
為問祗今江海上，如君無事幾人同。

遊方山觀梅

尋芳正及上春時，澗道縈紆恨到遲。  
花似西湖先得暖，人如東閣總能詩。  
酒中瘦影依稀見，席上寒香淡  
日莫醉歸花滿帽，從教大咲髮如絲。

寄梅雪

聞說公亭傍水開，黃茆為瓦不須裁。  
商舡無數青山遠，書按尋常白鳥來。  
已信漆園非俗吏，誰知關令是仙才。  
煩君莫抱窮途恨，萬事都將付酒杯。

次高靜學韻

緼袍無裏食無餘，每被傍人咲著書。  
郭泰徒勞誇叔度，揚雄何敢擬相如。  
玉堂天上非吾夢，紫極宮前有弊廬。  
安得故人隣壤住，溪頭來往賦閑居。

陳氏先壟圖

雲山漠、冢崑、馬鬣封前躑躅開宗子祗緣懷牒去  
路人時為看碑來松間芻狗埋秋草地底魚燈徹夜臺  
惆悵年、寒食近白楊風起為興哀

送胡宗禹之播州驛丞

便路之官暫到家九溪窮處是天涯夜即沙軟多龍跡  
盤勢山迴似犬牙浦口勞歌催畫鷁門前使節詠皇華  
途中定有江行稿好寄東風萬里槎

贈致仕袁省翁

棄官歸去學尋真有道何愁白髮新湖上行春靈壽杖  
松間對客華陽巾佛書謾寫緣修靜丹藥頻丸為施人

自愧後生無所事也辭冠蓋乞閑身

故陳秀才哲手抄詩

世間無藥補清羸身沒雙親却倚誰少婦寫藏長別語  
故人收得舊編詩空窓夜漏沾書檢壞壁秋塵落研池  
須信才名天所忌後生休更擅文詞

送張憲史之江西

燕子歸時却離家洪州迢遞隔天涯風帆落浦朝投驛  
江火明隄夜探沙客裡寄書逢驛使幕中提筆待霜衙  
東春我亦尋歸棹約尔南湖看杏花

復見心錄文見寄

空堂晏坐一燈懸僧牒多應倍俗年老去已除行脚債



青房卷五  
悟來不說空。心禪千花禮。遍諸天降半偈。都將萬法傳。  
每愧塵勞煩。見問同鄉蕪。恐更同緣。

宿保叔塔院

赤闌閑倚。化人宮湖上。春陰望不窮。百尺樓臺空相外。  
萬家城郭。雨聲中。齋房漏滴蓮花水。講殿經翻貝葉風。  
自咲世緣心似石。擬焚香炷。問生公。

同安阻雨

出旬方到同安郭。水驛春寒懶放舡。白浪翻江風愈壯。  
黑雲粘樹雨長懸。烽頭僧磬惟聞響。沙口漁罾已罷牽。  
寄語群鷗莫相狎。只今無暇與攀緣。

春園漫興

水漫芳塘生暖波松林蘭若散鳴珂  
題詩故欲愁花鳥避酒還能憶薜蘿  
烟柳萬條供妙舞風鶯百轉當嬌歌  
醉斜烏帽歸來晚一路花飛撲面多

曉過淮陰

軍城鐵鎖曉開關使節星馳未敢閑  
淮水東流應到海瓜洲北去少逢山  
行人欲斷寒烟外遠燒時明亂葦間  
却憶帝城風物盛禮成酒及上春還

鳳陽使還

拜陵初罷雪雲晴使者南還荷  
聖靈馬上類更新舊曆風前重數短  
長亭逢入問俗諳僮語到處尋源驗水  
經却憶長干橋畔柳歸時應待眼青

雪中懷周大使倬

憶君官舍傍苔磯，正是天寒雪擁扉。  
堂上客來公吏散，山前市罷估舡稀。  
宦情淡泊同流水，鄉思蒼茫對夕暉。  
歲晚荒村無可寄，擬將詩句托鴻飛。

沅水驛

憶昨鳴榔出帝鄉，水程五十到南荒。  
地連島嶼諸蠻雜，山入辰沅萬里長。  
翠靄羃林光冉冉，玉泉鳴澗韻琅琅。  
麓川又在西林外，却倚危樓望夕陽。

送人歸隱

野鶴孤雲無定期，閑林棲息本相宜。  
兩荒苔石吟行徧，月落松窓醉起遲。  
載誦左思招隱賦，何慙陶令去來辭。

只今我亦從行役，愁絕黃花對阿誰。

送僧還天台省親

載經東去路迢迢，應為寧親到石橋。  
江上中齋尋午壑，沙邊夜梵雜寒潮。  
宰官問法留三宿，慈母焚香製七條。  
歲晚定知歸本寺，待予聽雪坐終宵。

寄南屏渭長老

蒲室傳心弟一宗，老尋古刹寄行蹤。  
贊花偈就人爭寫，壞色衣穿自懶縫。  
案上梵經皆貝葉，手中談麈是青松。  
何年惠遠重開社，來聽東林寺裡鐘。

寄紫金院喜性二衲

精藍西畔接城闌，野水交流絕四隣。  
過去真僧留半偈，

浮來古佛見三身夜深門有聽經虎歲稔厨多施米人  
遙憶兩禪相對處儼然無着與天親

贈景山中道立

古寺殘僧亂後稀獨來林下掩柴扉化人每轉千聲偈  
辟地惟將一衲衣池上蓮芳辭伴去山中松偃識師歸  
非關碩薄難行道自是群生與道違

寄道場聯上人

聖明新選黑衣中似共名山有宿因地上布金多長者  
室中傳偈搃門人法身已應諸天相定力能消萬劫塵  
愧我才華非鑿齒道安何事獨相親

初度寫懷時寓菁山

清時道跡見非才，茅屋秋深坐草萊。  
貧為無田心獨泰，衰因多病髮先摧。  
江天白鳥留子狎，家圃黃花待主開。  
自愧年來初度日，常叨旅次故人杯。

高記室為予題菁山隱居次韻寄謝

幽々山墅隔江城，老大纔思避姓名。  
兩屐苔荒林外迹，一瓢風撼樹間聲。  
僧探住近邀禪坐，友慮盟疎折簡行。  
脫使終南稱捷徑，稚圭移到若為情。

過何山廢寺

千峰寂々寺門開，石迳春風長綠苔。  
佛閣丹青餘瓦礫，禪房花木變蒿萊。  
翻經室壞僧應散，施食臺空鳥自来。  
誰料空門亦如此，獨臨斜日重徘徊。

重過蜀山徐幼文隱居

憐君舊隱此林間，一去神京未得還。  
獨客重來多白髮，故人不見只青山。  
岸前古樹曾維艇，雪後高齋幾扣關。  
何日能除簪紱繫，莫年相約共投閑。

贈傅山人

善相似

知君本性愛雲山，浪迹江湖每忘還。  
相氣獨遊飛鳥上，窮源多在亂松間。  
予重巖穴行應遍，一片機心久已閑。  
亦欲相從尋勝地，青鞋藜杖共躋攀。

訪許文學不遇

杖策思尋半日閑，偶隨流水過前山。  
林中不見童迎客，竹外惟聞犬護關。  
道服自懸虛牖下，茶巾空掛夕陽間。

到門不遇君携手惆悵荒村暮獨還

送人之官閩中

鄉情寥落宦情牽一片征帆帶雨懸  
投驛遙瞻閩嶺樹問程先下浙江船  
公庭理訟桄榔外客舍鳴琴荔子邊  
聞道武夷山水勝經過須為一留連

重陽道院

玉礪泉香草自春丹樓南下瞰城闈  
青衣童子曾來地白石先生過去身  
九轉爐寒銷宿火七真堂古暗秋塵  
松間道士多九骨未省誰為出世人

官解雨中

邑里蕭條民未復齋居卑濕病相牽  
客愁連月惟聞雨



農事關心擬問天自幸拙耕終歲飽更慚中酒日高眠  
不才如此真堪棄敢負明時費俸錢

客夜有懷

欲洗閒愁把酒傾酒醒愁思又還生青燈背壁客孤坐  
黃葉滿階蛩亂鳴千里有懷頻入夢一身如寄若為情  
山長水遠人何處兩岸蘆花月自明

寄方貞外

結髮從戎二十年獨揮赤管萬人前新辭祿秩緣思隱  
閑學齋居似愛禪病裡頻書賒藥券愁中久絕看花筵  
懷君不隔天涯遠只在荒城暮雨邊

夜懷傅生森

深夜相思浣水邊  
情懷堪恨復堪憐  
雲山千里書不到  
風雨一樓人獨眠  
蛩帶秋聲吟壁下  
鼠窺燈影出窓前  
去年記得西湖上  
醉倒荷花香滿船

寄徐主事

網羅初解命如絲  
一片忠誠結主知  
戴月曉趨丹鳳闕  
移燈暮宿白雲司  
鄉書無便還家少  
旅思多驚得夢遲  
每到松間并石上  
懷君愁見舊題詩

贈彈箏人

先輩曾將舊曲傳  
纖、銀甲更堪憐  
清和未數湘靈瑟  
哀怨渾同蜀國絃  
鶯弄晚風啼復歇  
鴈飛秋水斷還連  
坐中北客聽來少  
暗想當時一惘然

贈鄭邴文

兩鬢星々小幅巾蒼松氣節鶴精神居常倒屣迎佳客  
貧不將詩謁貴人踏雪抱琴梅嶼曉典衣沽酒柳橋春  
若非道眼高明者誰肯甘心寂寞濱

送蕭縣丞朝京

天官妙選待才賢茂宰清名衆所傳漠々去帆衝暮雨  
蕭々行李似當年逶迤客路朝京口迢迓王城在日邊  
為說烏程民吏待金陵酒美莫留連

金華道中送鄭邴文東歸

柳絮飛々共語離尊前會面定何時交情冷淡孤衷在  
世味辛酸兩鬢知春水亂灘船下疾曉風殘月酒醒遲

湖邊鷗鷺休相咲  
破篋無錢只有詩

金陵道中

孤舟曉出古關西  
江樹蕭疎遠壞堤  
七里岡前寒雪霽  
三茅峰頂暮雲齊  
酒家寂寞人稀醉  
車路縱橫客易迷  
迢遞漸看官闕近  
月明時聽夜烏啼

揚州道中

馬頭津口足風波  
歲晏遙乘一傳過  
南渡客來多漢語  
下江船去半吳歌  
蕪城總入新編戶  
瓜步斜連古漕河  
何處吹簫明月夜  
野田茅屋曉烟多

燕山客中

只合山中度歲時  
欲求聞達豈相宜  
命輕似絮人爭咲

心直如絃鬼亦知怕見是非休看史未忘習業尚耽詩  
春風歸去江南路芳草滿汀花滿枝

喜則堂大叅南歸

故國衣冠已變遷靈光此際獨依然一身幽薊二千里  
兩鬢風霜十九年歸去午橋非舊日夢飛秋塞隔遙天  
江南遺老如公少青史名高萬古傳

閩中春暮

吳山入夢驛程賒身逐孤杭客海涯九十日春多是雨  
三千里路未歸家枕柳土潤蠻烟合楊柳江深瘴霧遮  
倚徧闌干愁似海杜鵑啼過木蘭花

過春申君故城

女牆傾壞雉樓平遺址人傳是楚城  
遙憶玳簪曾到處  
閑陪珠履此中行雨餘但見狐狸迹  
月冷疑聞劍珮聲  
今古豪華成底事臨風惆悵不勝情

挽徐秋官先生

榮名堪羨死堪憐遺骨歸來附客船  
身歿異鄉無子送  
名香後世有詩傳丹旌猶寫生時爵  
白日難開地底天  
惟有門生懷舊德獨臨蕙帳一潸然

燈花

畫堂銀燭暎歌鐘醉眼俄驚火  
樹紅白玉屏深留晚艷  
絳紗籠暖護春叢闌干清淚非因雨  
狼藉殘煤總為風  
更憶禁垣歸路靜金蓮隨馬散文虹

登姑蘇臺懷古

荒臺獨上故城西  
輦路淒涼草樹迷  
廢塚已無金虎踞  
壞墻時有夜烏啼  
採香逕斷來麋鹿  
響屨廊空變蒺藜  
欲吊伍員何處是  
淡烟斜日不堪題

涉世寄道衍

涉世情懷冷似冰  
狂歌醉飲任騰騰  
隨緣即是無心佛  
達理何拘有髮僧  
但得遺風追賈島  
不須虛譽繼盧能  
歸山未有謀身計  
空憶閑雲鎖碧層

送越上人住蔣山

落落晨星著舊稀  
奮然一出拯危機  
石頭路滑有時到  
山頂雲深無夢歸  
帆葉飽風衝白浪  
雪花和露濕緇衣

八功德水談空處應有江禽入座飛

送祖上人往京謁本師

載經遠向日邊遊因謁名師上石頭到寺定知衝曉霧  
還山應是過殘秋千燈喻法元無盡一鉢隨身信自留  
大道本來無去住暫時相別莫多愁

寄婺州信長老

軒昂頭角法中龍攫霧擎雲興已慵見說深山居幾夏  
只披弊衲過三冬鳥啣臺上出生飯虎避岩前入定松  
近日諸方知道價傳燈應可繼南宗

送蓮社陸道師歸鏡湖別業

一錫橫飛下鏡湖頭顱老去世緣疎庭栽竹少堪容鶴



池種蓮多不礙魚滿室香雲經盡後半窓明月定回初  
陶潛懶入東林社在、青山可結廬

寄贈香山上人

塵機息盡悟無生日、空山伴鶴行月冷澗泉搖錫影  
風傳松籟雜經聲迹虛自了三空法見性全消五蘊情  
莫學湯休餘習在却來人世競詩名

谷山西楊憲副故舊見寄

晉鄙遙山接太霞十年從仕鬢空華秋來有鴈偏催客  
臆盡無梅更憶家私屬羊毛皆入稅邊風馬乳代烹茶  
番思共隱江南日每為論詩到晚鴉

靜居集卷之五

靜居集卷之六  
潯陽張羽來儀著

五言絕句

古意

青松如妾心  
好花如妾面  
花好有時衰  
松死節不變  
憶郎去不歸  
淚向東風落  
不恨郎恩輕  
自恨妾命薄

古恨

嗟嗟誰家女  
汲泉來古井  
綆短不可深  
俯首吊孤影  
嗟嗟誰家女  
匄下事機織  
青蠅適何來  
一玷黑不白

和楊孟載刺客四詠

筑

鈿重難抱彈  
彈皆北鄙聲  
試手向君側  
泰山一毫輕

推

制秦強晉鄙揮袖安國家却咲賢公子虛投博浪沙

劍

黃河三尺水常汚平冤血腥射滅銀燈影半夜悲風生

匕首

千丈騰白虹斜三寸含秋霜仇報將身許不肯悞徐娘

約高王諸友賞月

平分秋色夜桂魄正團圓最好邀同賞那容靜自看  
玉露耀金波璇霄迤素娥盍持衆落酒宛和鵲飛歌

石屋在天平山十二景之一

山根攢棟宇簷椽勢峻嶒却許誰來住閑雲共老僧

琴臺 在靈岩山夫差鳴琴處

坐鼓朱絃日玉人方入吳于今山下惟聽夜啼鳥

山寺阻雨

游子家何許欲去復停佇曉來雷破山門外正風雨

贈永中山人

之子西峰來問我西祖意欲答還無言風吹花落地

讀周尉月山吟稿

擁毳披新詩寒生坐禪石山空四無人咲看孤月白

山中二絕

一聲山鳥啼幽夢忽喚醒起來開竹扉日上中峯頂  
窓前瀑布寒林外夕陽薄清風何處來撲撲松花落

山中四景 春夏秋冬各一首

半啓柴扉曉東風昨夜狂  
樹頭花落盡滿地白雲香  
六月山深處松風冷襲衣  
遙知城市裡撲面火塵飛  
獨坐澗邊石林空秋意長  
夜深山月白松露滴衣涼  
山翁苦愛山山中結茅屋  
夜來風雪深壓折窓前竹

題徐幼文畫

溪路過橋分晴山自少雲  
茅堂遠相訪憶似我迎君

晚眺有懷

相思天外人極目倚山閣  
一鴈不飛來寒汀暮潮落

偶成

正月梅花落二月桃花紅  
榮枯知有數不必怨東風

蕉

綠綺含風弱芳絨卷露新憶在閑庭院婆娑映玉人

萱

佳人重生男競種宜男草東隣有孀婦對花空自老  
酒號忘憂物花名乃相偶憂來對花坐何如飲美酒

秋夜臥病

清齋夜方寂卧病誰相親秋螢如有意殷勤來照人

絕句

荒村無四鄰茅齋夜深雨田犬時一鳴厨人暗中語  
十載湖邊客何人伴杖藜登山臨水興惟有阿通知

胡騎圖

弓劍隨身帶，關支細馬馱。天寒水草速，更過白狼河。  
陳火照紅雲，龍廷戰未分。金兜上馬去，應避李將軍。

重午四詠 守宮 艾虎 百索 辟兵符

玉杵搗香酥，試來紅入髓。抵用苦關防，妾身清似水。  
作偽欲成真，猙獍門下掛。若教鬼有靈，看來應未怕。  
千絲復萬縷，向兒臂上纏。教兒長壽命，一寸一年。  
四海靜無塵，干戈化縉紳。兵符何用戴，聊復應時新。

觀魏武本紀

促駘蟬蛸短，雄心日月長。玉床飄縹帳，徒自戀餘香。

画

江水綠沉沉，危峰倒夕陰。何人倚高閣，月出聽龍吟。

白雲飛不定青山斷復通  
澗道多機杼時鳴春樹中  
長松生夏寒野水淨人目  
借得相鶴經持來石上讀  
一雨漲新綠雲開四山繞  
人掩華門深斜陽照江鳥  
空山無四鄰閑森映秋水  
時有負薪人唱歌白雲裏  
我掩手中卷尔罷膝上琴  
相看坐成晚山水有餘音  
竿擢久隨身情於白鳥親  
一蓑江上老閱盡徃來人  
岩雲捲輕素紅葉當風隨  
林亭秋色多誰能來此坐  
雲寒鳥歸急落日千峰歛  
不見暮樵還林森靜中掩  
舟隨烟鶴遠行盡碧溪灣  
歸來小齋裏寫得向來山

章舟隱畫

扁舟小於葉來往橫塘裡  
為看青山多畫得青山似



仲穆着色蘭

芳草碧萋萋，思君澧水西。  
盈、葉上露似欲向人啼。  
鸞輿去不返，風雨湘江曲。  
芳草獨無情，還如裙帶綠。

竹

幸逃斤斧憂，獨抱風霜節。  
時有畸禽來，枝頭弄明月。

倭扇

萬國扶桑外，年、貢扇來皇都。  
無酷暑，賜與拂塵埃。

山居七詠題送周伯暘

盤雲陟危磴，十步五迴坐。  
道傍無虎跡，曾有遊仙過。

右遊仙頂

秀出衆峰頂，尋常雲霧繞。  
上有萬年松，食之入不老。

右白石山

負薪閱方策寧慕軒冕榮至今明月夜猶聞吾伊聲

右樵讀塢

空林無人行下有百年墓洒掃仗何人蕭々白楊樹

右古冢叢

竹林路陰々尋幽不覺深不比羊腸坂空傷行客心

右九曲嶺

偶逐微官去暫掩林間宅手種山菜萁歸時高幾尺

右冷瀆

春風試茶處潭上葛花開去盡同遊伴傷心獨此來

右月潭

寄方復外以常

水竹小窓西新詩待我題相過雖不厭只怕踏春泥  
清晨眺高閣積雨春陽晦望君愈遙青山愁獨對

吳興四賢守

洪武十一年命天下郡縣脩志書平陽魏公琦同知  
湖州府寔輪葢其事舊志府縣官惟守令有題名餘  
皆不得錄至是公命續志自僚佐以下皆得書焉其  
用意忠厚不没人善蓋如此他日又摘晉唐以來守  
之已著者四人為勝游圖以致尚友千載之意云  
勝日罷書經揚舲出遠坳清流兼峻嶺應不減蘭亭

王羲之

乍別征南幕，神閒務亦閒。此中可高卧，何必在東山。

謝安石

刺史放衙早，輕舟泛碧池。祇應官事了，來寫放生碑。

顏真卿

聞道蘇灣裡，先生舊此遊。湖天風物好，應勝在儋州。

蘇東坡

月潭試茶

乞火從山婦，臨流煮澗芳。恠來泉味好，併帶落花香。

寺中書所見

蕩子秋未還，双蛾斂寒翠。微步入蓮宮，誰知此中意。  
脩廊徧行却，風吹合惟帶。小立避遊人，佯對香爐拜。

杭州西湖四題

六一泉

醉翁去已久廢寺泉流圍朝來春雨涼照見山雞舞

蘇公堤

築土捍衝啣兀障狂瀾久青眼只依然人那不如柳

保公巖

青苔滿石龕隱、跣跡想見夜禪深岩前雨花積

蘇小墳

冷落百花朝無人上畫橋東風吹綠草依舊似裙腰

問徐道士病

脩竹閉雲房細路穿亂石如何塵中人未問仙家疾

水邊桃花

何處惜春華  
天桃水際花  
明朝風雨後  
流落傍誰家

画

嵐深山影寒  
樵響不知處  
綠樹早鶯時  
千峰一家住  
孤邨翳餘景  
涼颿洒空谷  
斜日澹烟蕪  
坐看千里綠  
種菊人未還  
天香滿林樾  
孤村雲氣深  
微雨洒初歇  
凍樹僵挺、湖山雪  
飛吟却有推蓬入  
茶香夢初醒

蘭室五詠 香 根 芽 葉 花

雜麝猶能別  
蕪風更不分  
靜時還自得  
覓處却無聞  
秋風凋綠艷  
芳氣坐來歇  
但使本根在  
寧愁蕭艾沒  
冒土紅初茁  
綠緣地綠漸  
縈道人偏愛  
惜不敢下階行

泛露光偏亂，含風影自斜。俗人那解此，看葉勝看花。  
能白更蕪黃，無人亦自芳。寸心原不大，容得許多香。  
看菊懷孟載幼文

有月曾同賞，無山不共遊。別餘數載後，空對一籬秋。  
贈張思廉韻次余克臣

子有鬼谷術，妙筭握諸掌。劇談徹天機，不覺稽吾顙。  
匣闕雙轆轤，瑩若黃河水。半夜寒氣吐，射滅床畔燈。  
未掉下齊舌，智士恒鬱伊。盍從韓吏部，去草淮西碑。

方園雜咏十二題

抱甕汲晨井，灌餘烟景微。獨坐卷脩綆，園芳香滿衣。

憇甕臺

小坂平如掌春深綠草肥牛羊識家近日夕自能歸

牛羊坂

北亭望南隩高林照薜蘿日暮鳥聲急時聞勞者歌

南嶼

坐愛靡蕪綠王孫罷遠游不似湘江上千里動離愁

芷畦

故苑金溝斷荒園碧草秋南朝多帝澤曾向此中流

古溝

采采不盈掬幽芳逐微步欲為公子裳敢畏行多露

采藍逕

杖藜成獨往青林入跡稀日晏迷歸路翠實冒秋衣



蒼耳薄

舉頭見南山相去應幾里莫言不在山看山如屋裏

見山坡

隣近到仙居瑤林闕清境夜深明月來送過幡幢影

道林

結屋連碧篠虛牖抱圓開如何天上月移向壁間來

月牖

園井汲寒渌當窓煮金屑應有山僧來問君汲春雪

茶宴堂

一壺兼一杖獨行東塢裏稚子倚柴門孤煙屋頭起

東坵

畫

高人自無偶，獨向亭中坐。  
日落山風來，時聞松子墮。  
澗路獨行遲，閑雲逐杖藜。  
欲尋泉落處，應祇野猿知。

移蕉

移得山後蕉，種傍山前屋。  
扶疎數葉開，還如山後綠。

客中聞鴈

南地春光老，行行向北飛。  
可憐雲水客，不及爾知歸。

燕山九日

九日燕南客，三千里路家無人。  
送酒至一嘯，領黃花

將歸

數載客京華，無媒苦憶家家。  
人猶念我連夜卜燈花。

六言律絕

題慈感雪峰所藏胡廷暉白雲出岫圖

舍北舍南流水峰前峰後閑雲漁樵底須相訝麋鹿自  
可為群長松落落朝對清猿啾啾夜聞為問王孫歸未  
桂花如雪紛紛

画

看山却勝看画聽泉何殊聽琴賸得雲林雅趣且憑泉  
石清吟

雪夜

清夜無錢沽酒折鐺獨自煎茶門外雪深三尺只愁凍  
損梅花

七言絕句

元日

風綻紅雲消積雪  
陽回玉琯動輕灰  
人生但愛韶華好  
不道容顏是此催

早春野望

凍雪初消春水流  
閑看柳色到溪頭  
梅花落盡桃花未  
如此風光直似秋

春夜

夜靜風簾掩復開  
南園烟月正徘徊  
此時客夢渾難就  
無柰花香枕上來

惜春

重重綠樹掩園扉，無柰庭前花亂飛。  
試向鏡中看白髮，能消幾度送春歸。

試題隣家杏花

梅花飛盡杏花開，應是春風費剪裁。  
自咲隣翁空愛惜，一枝分送出牆來。

蝶

春來到處逐芬芳，飛過朱樓與畫牆。  
最是佳人偏愛惜，雙雙繡入舞衣裳。

芍藥

綠雲鵲護晴霞，自是人間富貴花。  
試問洛陽遊賞地，如今還有幾豪家。

飲吳別駕園次韻高李迪席上作

旅踪忘却滯天涯  
闔席斯文喜一家  
可柰酒闌清興在  
捲簾帶雨咏梨花

雨中想東園杏花

齋居清晝四無隣  
黃卷中間過半春  
落盡杏花渾不看  
少年人似老年人

雨霽

雨霽垂楊帶暖烟  
千村草色淡相連  
殷勤好問桑間女  
今日春蚕第幾眠

白鳥

門前春水下輕鷗  
來往偏能近釣舟  
却似南唐圖畫裡

杏花蒲葉滿汀洲

尋花

朝來陌上試尋春  
桼杏溪桃各開新  
但恐東風留不久  
一時吹逐馬蹄塵

野市

隔籬春筍參差出  
滿路野花撩亂開  
屋角布姑啼正急  
暖雲分雨過山來

雨中桃花

一樹穠華絕可憐  
開逢風雨不成妍  
遊蜂似識人憐惜  
啣得飛紅過檻前

和楊孟戴花時感事三首

不是春來睡轉濃，耐他花鳥怨東風。  
枝頭那解聲，巧徑裏，後憐點、紅。

開過棠梨春，不知鳥聲喚醒少年時。  
謝家庭院秋千下，曾費黃金賞阿誰。  
雨過香紅瘦，地輕可堪啼鴉，迸流鶯。  
一年春色成姑負，不似當時放浪情。

別李寄閑

客羶未暖，各西東。望斷吳山杳，靄中燕子不來春。  
又老滿襟離思，落花風。

和季迥看花已過之作

春來已辦賞花期，奄忽東風綠滿枝。  
回首紅香已成夢。



一年好景幾多時

和李迪春思

何故飛花拂髮絲  
客愁春老不多時  
總憑黃鳥啼留戀  
亦懶來聽一賦詩

送春

今朝檢曆知時換  
落絮飛花各閉輕  
漫把一杯留別意  
夕陽時節更傷情

暨陽別友

渺渺春風生綠波  
故人離別思如何  
陽關一曲移船去  
飛絮滿前殘照多

野步即事

村北村南叫鷓鴣  
山前山後雨初收  
牧雛不管蓑衣濕  
一笛春風倒跨牛

夏日聞鶯

上林花裏亂鶯啼  
日暖風柔百轉齊  
何似綠陰清晝永  
一聲遙出畫闌西

夏日宮詞

避暑難陪複道行  
長門寂寂斷人聲  
獨將玉枕雙紋簟  
卧對荷花萬種情

翠幙湘簾著地垂  
分明前歲奉恩時  
年來不待龍舟宴  
菱葉荷花自滿池

夏雨新霽圖

看圖憶得住山阿茅屋深深隱薜蘿風雨過來啼鳥靜  
白雲更比綠陰多

池亭夏夜

方床岸幘坐來遲拂拂涼風半醉時好句忽圓人拍手  
鷺鷥飛起藕花池

重午回文

輕羅扇試新詞好玉臂雙圍綵縷長清簟晝閑人闌草  
午風微裊篆爐香

觀競渡

橫波爭賭木蘭舟多少人看倚綵樓日暮江空簫鼓散  
靈均不見水空流

荷

晴波浮影翠浮光欲整還歌柄柄長可愛晚來涼思好  
一池風攪碧雲香

晴望

夜聞風雨曉無聲湖上青山似染成試倚赤闌西向望  
紅雲多處是南京

山下晚步

獨行松路野橋西山晚涼風逐杖藜知有人家還隔水  
烟中聽得夕陽雞

桂花開值雨

桂子誰分月裡枝亭亭開向暮秋時朝來風雨如相妬

花下傳觴謾作期

西村夜歸

月落西林客夜歸  
前溪烟樹遠依微  
山村寂寂無燈火  
惟見鷺禽散亂飛

秋日簷蔔花

夏天曾見幽人宅  
秋日仍開野客家  
素質惟堪伴丹桂  
清香應不愧黃花

雲川舟中

兩岸蒼花水一溪  
白沙浦口放船時  
斜陽目送南飛鴈  
過却好山都不知

山居

翠微深處結茅廬着我閑身一事無  
占得白雲三萬頃  
年年不用納官租

贈琴士

有客夜半來山中橫琴坐石彈  
松風松風曲罷抱琴去  
落月一聲天外鴻

山中作

世事無因到翠微  
禪心詩思共依依  
白雲為被石為枕  
卧看岩前雪瀑飛

詠白芙蓉

早霜時節獨芬芳  
白雪肌膚織翠裳  
風弄玉盤持不定  
一杯清露瀉銀塘

題陶淵明像

五兒長大翟卿賢  
彭澤歸來只醉眠  
籬下黃花門外柳  
秋光不似羲熙前

寄陳麟處士

先生九里松間住  
松下橋橫玉一溪  
想得清吟山月夜  
秋雲滿樹白猿啼

秋日郊居

衰草寒烟斷復連  
青山漠漠樹綿綿  
終朝門巷無人過  
只有黃花滿眼前

步月

夜深月上青石闌  
滿窓明月生蒲團  
興來出門步明月

一聲老鶴天風寒

山居秋景

年來懶為利名愁未老先尋退步休  
山色滿窓山鳥寂  
一床清夢白雲秋

湖上晚步

畫橈歸去歇笙簫水影山光共寂寥  
一笑相逢雙鬢雪  
向人猶自話前朝

九月八日菊次徐幼文韻

籬落黃花香吐新一尊預把慰秋晨  
登高總為明朝樂  
醉舞狂歌特讓人

山行乍見梅花



霜落空林石磴危  
數枝輕折早寒時  
水村溪路尋常見  
自是山中看更奇

尋梅

杖藜獨冒曉霜來  
行遍山村與水隈  
何事南枝開尚晚  
花神應是待詩催

舟中似文性之山長

朔風吹浪打篷窓  
夜靜寒威不可降  
自嘆閑人閑未得  
扁舟載雪過吳江

冬夕懷方仲容

鴈聲歷歷起寒沙  
人往五雲深處家  
魂夢隔江飛不去  
依然和月在梅花

冬日無題

雪凍瑤堦翠襪冰錦襜雖擁栗膚生歸憑粉閣沉香火  
暖却纖纖暖玉笙

約友賞梅不至

一樹兩樹花如雪十里五里香不歇玉人未來愁思深  
三更立盡孤筇月

紅白梅花

一種春風兩種奇銅瓶並插更相宜詩人自得花中意  
不在深紅淺白時

寒夜宿山庵

撥拙爐頭無主賓蒲團坐久自生春夜深一片虛櫺月

寫出梅花面目真

寄鶴瓢李士明時施藥寧真館甚驗

聃孫嘗熟衛生經  
咲握仙瓢類鶴形  
傳得壺天長房術  
世人休訝藥偏靈

張季璉書樓

一樓瞰碧石湖陰  
簾隔黃埃翠竹深  
月色滿闌風滿案  
分明呈露聖賢心

書朱性夫吟卷後

新編寄我白雲中  
句法清圓音趣空  
底事畧無烟火氣  
吟時和露立松風

畫

玉洞仙桃萬樹花樓臺彷彿蔡經家  
神丹煉就何須服  
乞與山童飼白鴉

百道清泉石上流白雲初起亂峰秋  
此中疑有陶弘景  
飽聽松風臥草樓

丹崖碧嶂杳難攀臺殿高低積翠間  
試遣北人來看著  
多應說似洛陽山

踈散元非用世才日高林戶尚慵開  
為憐湖上青山好  
行到冬青樹底來

暮過西曠

白水泱泱繞壞堤隔林遙聽夕陽雞  
閑行每到東邊少  
為有青山在屋西

東園報杏花未開

芳葩未拆避春寒日、煩君遶畫闌莫是主家曾見慣  
含情欲待外人看

悼高青丘李迪

燈前把卷淚双垂妻子驚看那得知江上故人身已沒  
篋中尋得寄來詩

消息初傳信又疑君已誰復可言詩中郎幼女今癡小  
遺稿千篇付與誰

生平意氣竟何為無祿無田最可悲賴有聲名消不泯  
漢家樂府盛唐詩

挽楊憲副孟載

南北雲山賦遠遊白頭終老晉陽秋千篇留得平生稿  
半似蘇州半郢州  
恨不尋君未死前須臾一別便千年慰人幸有全烏在  
他日應能續太玄

哀宋君女阿歸

客來喚出最鍾情暫別誰知便隔生昨日閩州書信到  
傷心猶有阿歸名

贈卜者

老依卜市不論錢習靜年來白已玄安得相逢王輔嗣  
垂簾對坐說先天

孟襄陽雪行圖

雪滿秦京欲去遲，故人當路謾相知。  
平生多少驚人句，却向君前誦怨詩。

寄靈隱良泐二長老

兩禪相對一燈懸，鷲嶺龍宮地悄然。  
七百年来無好句，泉聲空繞寺門前。

林下燒笋

亂堆黃葉就林邊，火力均時味已全。  
日暮棲禽疑未下，竹根猶自起殘烟。

寫画遂題

薜荔花開僧舍閒，聞香時到竹窓間。  
朝來小試南唐墨，寫得溪南數疊山。

聽老者理琵琶

老來絃索久相違，心事雖存指力微。  
莫更重彈白翎雀，如今座上北人稀。

次孤山

水繞荒山路半斜，墓園無主屬官家。  
我來正是梅開日，滿目蓬蒿不見花。

頭陀菴聯道者

苦行能便自小持，松龕寂寂到人稀。  
齋厨日晏孤烟起，童子新將施米歸。

取勝亭感舊

綠雨微消紫陌塵，湖光冷落似無春。  
朱門記得曾遊處，



揚柳青二不見人

海會僧舍書時子癡

床頭書卷墜牙籤病起名香手自拈氣息未回禪誦少  
猶能彈古講楞嚴

寄友

客路尋常怨別離况逢秋色倍堪悲一封書到千山暮  
正是思君獨坐時

梅雪軒

山如東郭先生里屋似西湖處士家為問軒中清白吏  
還應比雪比梅花

畫贈長興典史杜濬初任武昌津射乎其居

杜若溪頭山似戟武昌門外柳如烟何如津射平前去  
東帶閑耕墓下田

曉發嘉興似友

城烏啼散驛樓空一舸夷猶曙色中不是故人今日共  
定應愁絕雨兼風

謝安王羲之劉伶孟浩然

典午風流數謝公高標自許伯夷同桓郎跋扈持郎健  
都在尚書雅量中

白葛為巾不裹頭蘭亭會裡最風流老來忘却觀鵝癖  
只愛山人許遠游

鹿車載酒竹間期不記山妻泣諫時已識形骸為外物

青居卷六  
何須倚鍾鎮相隨

四門雪滿放朝回  
油壁金鞍覆地來  
誰似蹇驢烏帽客  
解吟花逼艷陽開

雙馭圖

內官粧束樣能齊  
宛洛春風信馬蹄  
共說放朝無一事  
看花直到夾城西

舟中聞歌

何處清歌短更長  
渚風沙雨共淒涼  
不須直向天涯聽  
一日辭家已斷腸

題畫寄友

舊是雲山自在身  
誤將書劍逐風塵  
犢車何日移家去

還作條來種杏人

贈五河驛丞孫本

驛樓鬱、古河濱日、征帆送使臣不共燈前一杯酒  
那知亭長是詩人

小遊仙

洞口春泉漱碧沙樓臺彷彿蔡經家赤鸞啣得金盤子  
擲向窓前樹、花

晞髮扶桑露氣新三花樹底坐調笙到門解說長生理  
只有茅家好弟兄

朝遊碧海不騎魚鳳引霓旌鶴引車吟得步虛誰解和  
歸來閑倩少霞書

門外南風吹葛花  
奕砧人散樹陰斜  
青童睡起渾無事  
乞與神丹餒白鴉

遊天界寺見亡友高旻題壁詩有感

香臺空想舊遊踪  
化鶴俄成踏雪鴻  
贖有好詩留壁上  
老僧恨欠碧紗籠

詩題敗壁墨猶存  
苔色微侵屋漏痕  
十五年餘舊知己  
來看一度一消魂

題故友楊孟載所画竹

數葉蕭蕭淨俗塵  
人雖物故墨猶新  
故人清瘦原如竹  
見竹何殊見故人

登廬山南聽雨軒感懷

華陽洞裏烟霞闕雲石山中草樹荒惟有小樓曾宿處  
年年春雨滿滄浪

黃冠野服神逾玉畫草詩篇老更奇白首故人無在者  
小樓殘燭雨來時

宮詞二首

舞衣不着罷熏香金鑰無聲白晝長憑仗玉奴休弄笛  
恐驚池底睡鴛鴦

永日深宮鎖翠娥岩堯丹闕度絃歌羊車久不行來處  
竹色苔痕積漸多

廢寺

白晝開門一兩僧山房深掩蘚花青西風不管鐘魚破

自在斜陽與塔鈴

寄天目山雍長老

天目之山青岩堯道人縛屋青山椒白雲出山不歸去  
春風吹老黃精苗

雲巖古泉 即虎丘井也

一脈靈源劫外春蒼苔冉冉石粼粼老僧咲指庭前栢  
曾見開山卓錫人

雪竇瀑布 在寧波

一道飛來翠竇中喧雷噴雪冷含風老僧月下遙看處  
千尺玉龍垂半空

金華道中

芳草平鋪山遠近小橋低跨水西東人歸矮屋離邊去  
啼鳥數聲烟雨中

維陽春晚

烟籠柳影亂鶯啼雨濕芹香乳燕飛二十四橋春又盡  
江南詞客正思歸

登韓信城望漂母墓

遶城春水綠含漪遙憶沙頭漣繞時若愛當時一盂飯  
十年孤塚有誰知

燕山春暮

金水橋邊蜀鳥啼玉泉山下柳花飛江南江北三千里  
愁絕春歸客未歸



賜倭扇

小國貢來東海外尚方分給午門前終身永寶  
君王寵總遇秋風莫棄捐

青宮甲觀倚雲開侍從如雲總俊才  
昨暮傳宣容握扇丹墀清曉謝恩來

將歸

歸舟五月發金陵遙見家山喜不勝  
却憶石頭城上望白雲何處是吳興

靜居集卷之六終



附錄

太常司丞張來儀墓銘

湖州府儒學教授金華童冀撰 字中州

喟來儀羽其名氏為張始祖戩官刺史家潯陽父諱先  
母王氏繼曰楊惟來儀幼穎悟耽辭章甫弱冠違休擾  
違故鄉克樹立擢科第聲遂揚長一山安定學教有方  
迨熙朝興文運舉賢良首薦鶚甘退鷁返屠羊病末  
學驚葩藻淪荒唐益刻厲追遠古還淳厖時休暇逐雲  
月酣詠觴分百年老韋布謝軒裳公車徵晨踵門暮趣  
裝比廷對膺寵命丞太常賦蹇剝尋罹譴投炎荒  
天萬里踰瘴海一葦杭未半道亟賜環澤汪洋抵

京國僅信宿遽云三身蚤闕才弗究惟永傷來儀生歲  
癸酉日在房月初吉壽五衷逾三霜歿乙丑實季夏哉  
生明娶徐氏亦蚤逝女已行繼室韓子肖象承烝嘗後  
三祀厝宅兆九里岡月建亥日己酉卜允臧惟來儀配  
古作足流芳壽云短言則傳來日長勒斯銘賁泉壤發  
幽光百世後石有泐名無忘

靜居先生挽詩

南郭呂勉字功懋吳中

僑居吳下自潯陽落筆文詞早擅場學識遠堪追賈馬  
才名近喜並高楊只宜吟嘯終南服俄見飛騰列太常  
幸獲全身優等類龍江渺々勝沅湘



靜居集後志

吾吳之詩自唐皮陸唱和為一盛再盛於元季自王  
元俞鄭元祐張天雨龔子敬陳子平宋子虛錢翼之  
陳敬初顧仲瑛輩各出所長以追匹乎古昔繼而張  
仲簡杜彥正王止仲楊孟載高季迪宋仲溫徐幼文  
陳惟寅丁遜學王汝器釋道衍輩附和而起故極天  
下之盛數詩之能必指先屈於吳也維時張來儀先  
生自江右來與高楊徐相友善聚首之際未嘗不以  
詩為事積之既盛名為大家輿論比唐之四傑故老  
言不惟文才之似而其攸終亦不相遠眉菴盈川令  
終如一太史存心無疵而斃則同乎賓王北郭雖不

一青居後序  
一  
溺海僅全要領而非首丘先生窟嶺表尋石還以對  
內政之不協恐禍及已遽投龍江以沒又與照鄰無  
異意詩在天壤間患惟不工耳苟工而名家則凡具  
人心者罔不知好之故不欲其傳而人自無不傳詩  
之存人之存也是知先生之年雖不永於當世而自有  
以延於後世未可以彼而易此吳中鈔本所謂靜居  
集者什惟二三生自幼抵老求之靡得其全不免文  
梓垂畢又得吳興本較之雖曰加倍猶未完備亦併  
刊入尚祈博識同志畀足成之尤為幸甚

弘治辛亥秋八月十二日吳晚生張聲謹志



跋

靜居集六卷明弘治辛亥刊本半葉十一行行二十一字黑口  
四周雙闌亦企翹張氏所刊明初四家之一也前有弘治元年  
盱江左贊序末有張習後志及童冀所撰墓銘鈐有鵝湖世家  
顧炯之印玉函山房藏書南齊李子裔孫遂徵私印各印余與  
眉菴北郭二集同獲於滬肆曾取豫章新雕本對勘一過是正  
極多舉其大者言之如卷一擬古第三首庭前有佳樹以下別  
爲一章第五首薄游上東門以下亦別爲一章娟淨軒及倪雲  
林畫二詩缺文二十九字賴明本得以補完高郵城詩兩機不  
容髮下補豈暇慮殺傷一朝謗書行將殞兵亦亡喏哉三里城  
四句至分卷次第尤爲迥異文淵閣著錄爲四卷豫章本因之  
此本原編六卷卷一五言古體卷二樂府歌行卷三七言古體

長短句卷四五言律卷五七言律卷六五言六言七言絕句咸  
依各體以爲卷第不似後來之但取篇葉齊等任意歸併也明  
人刻書往往師心自用不顧義例勇於改編此集之變易舊式  
實始於陳邦瞻之覆刻迨張本傳世既稀後人遂不知原編之  
爲六卷良足慨矣丙子三月杪傅增湘識於暘臺清水院

...

知